

臨

晉

縣

志



臨晉縣志卷十三

記二

金石記

金石次於古蹟從其類也古蹟往往名存而實亡金石則  
器物具在可摩挲可拓觀也往歲黃公廷光宰芮城獲北  
魏及唐以下碑刻三十餘種一時傳爲佳話臨晉距芮密  
邇偶一搜求卽獲古刻三十三種以是知聲明文物之邦  
邃谷深巖不少瑰奇特達之品韜蘊其間安得一羅而  
致之備鄉邦之文獻補史傳之缺遺豈特爲志乘之光而



已哉

金類

藥師院鐵鐘 政和八年舊在學宮前文昌閣舊志明史  
邦直鐘樓記云城中央舊有鐘樓宋政和間造縣治有  
懸鼓與鐘應鐘樓卑因繼而增之民國九年縣知事俞  
家驥於其地建亭護之爲文以記其事

文曰鐘樓在學宮南臺以磚砌高二丈許明知縣史邦  
直建萬厯二十八年知縣高惟岡復建文昌閣三楹於  
其上邑人謂之雲樓曉鐘列入八景之一縣志云鐘鑄

宋政和藥師院數百年物也鏗鯨恣肆響入雲中當五  
夜淒清之後微風捲入枕上時足喚醒塵世夢夢虞鄉  
進士賈修明詩云何處鐘鳴欲曙天文昌閣上有宮懸  
一聲響徹雲霄裏五夜魂驚枕席邊巨製工傳鳧氏手  
元音鑄自政和年間鷄起舞芳踪在休讓祖生先著鞭  
歷年茲久風雨侵殘棟宇欹穿堦圮圯仄民國九年家  
驥銜命忝宰是邦政餘偶暇輒嘗披覽邑乘流連往蹟  
思有以瀑前微而昭來許而雲樓曉鐘尤爲茲邑勝觀  
爰與士紳亟謀興葺拆去文昌閣三楹改建鐘亭於其

中亭旁本有雲路牌坊舊名雲樓以爲不若雲路之現  
成故顏之曰雲路曉鐘楹並繫一聯曰世代歷滄桑苑  
繫依然神物迥非凡響登臨間眺望山環宛爾斯民猶  
是唐風每遇來復日自省堂講演時卽鳴鐘以號召眞  
足發人猛省並將原有帝君偶像移於鐘亭東隅暨將  
境內發見各項金石碑碣臚列亭之南廡以期保存國  
粹而便文人墨客隨時摩挲併將亭旁原有南北雲路  
兩牌坊脩潤如式

鐵造像 像共五區識曰大定十二年壬辰十月辛酉十

五日庚戌謹有臨晉縣臨晉村維那郎李二行者男李海李江其孫阿大天心新婦劉氏陳氏同發願心鑄造相傳係清乾隆時在姚卓村出土村人立廟祀之旁有鐵羅漢十八無款識

鐵鼎 在姚卓村白龍廟內上鑄廣東人因遭兵革虜到河中府河中縣大元國二年造

銅佛像 無款識在縣南內和村廣聖寺高丈許當是明代古物

### 石類

太守樊演碑 通志列入漢碑今不存樊演墓詳古蹟記  
王顏妃等四面造像 大魏元年十月舊在縣東下朝村

普濟寺今移城內鐘樓

密雲太守霍揚碑 景明五年正月分書篆額密雲太守

霍揚之碑舊在縣東霍村今移北郭蒲坂中學校通篇  
僅十數字漫漶餘皆神采煥發筆法適古酷似陸涼之  
爨使君碑以僻在邊隅不獨歷來錄碑諸家所未見卽  
楊秋涓學博搜探金石亦未之及其纂修通志時稱是  
碑爲後人所題不能目爲漢刻云云豈彼時未見原石



歟民國九年縣知事俞家驥以元魏遺跡傳世益少且諸家金石皆未著錄尤可寶貴擬築亭護之未果旋爲蒲坂中校移去

討寇將軍左員外侍郎陳露和等造像座 年月漫漶存者僅題名而已審字體當是北朝時古物在縣東南大陳國民學校前

穆如正造像 年月漫漶僅存穆如正三字審字體當是北朝時物在縣西上豆氏村石佛寺

威烈將軍廣宗縣開國男○○○○造像殘石 無年月存

姓名六行審字體當是北朝時物舊在城內後寺前民國十一年縣知事俞家驥得於瓦礫中移度鐘樓

沙子壕三面造像 款識磨滅不可辨在東張家營沙子

壕高三尺餘三面鑄佛像亦是北朝時古物

聖壽寺四面造像 無款識在坑西村聖壽寺共兩區均

四面鑄佛像一在寺內一在寺外當是北朝時古物

東任上造像 無款識在東任上村道旁高三尺餘鑄佛

十餘區村人以磚砌於墻上當是北朝時古物

龍柏寺造像 無款識在武村龍柏寺高五尺餘當是北

朝時古物

疑坡村造像 款識漫漶不可辨在疑坡村村公所牆內  
亦是北朝時古物

尙元崇等造像 武成元年在縣東下朝村普濟寺東首  
石佛寺

張法和等造像 像始於周保定二年訖於隋開皇六年  
高一丈八尺座四周有識有題名在縣東北亭東村外  
莫道池村造像 款識磨滅僅一二字隱約能辨在莫道  
池村邊高五尺餘鐫像十餘區當是唐以前古物也

南暢村造像 無款識在南暢村佛爺廟高丈許當是唐以前古物也

慈雲寺造像 無款識在城內慈雲寺高丈許當是唐以前古物也按慈雲寺俗稱後寺

城西村造像 無款識在城西村石佛殿當是唐以前古物也

覺郎寺造像 無款識在前卓頭村覺郎寺東石佛洞高三尺餘亦是唐以前物

西里屯造像 無款識在西里屯村南石佛廟內高三尺

餘當是唐以前物也

張延和等四面造像 開皇三年舊在縣東下朝村普濟寺民國十一年縣知事俞家驥移皮城內鐘樓

梁州刺史陳茂碑 在縣東北小嶷山麓陳平莊民國十年縣知事俞家驥建亭護之通志云集古錄陳茂碑不著撰書人名氏而字畫精勁可喜隋書列傳載茂事尤多闕謬傳云高祖爲隋國公引爲寮佐及受禪拜給事黃門侍郎在官十餘年轉益州總管司馬遷太府卿後數載卒而碑厯序爲高祖寮佐時官傳雖不書可也其

自爲黃門侍郎後又爲行軍元帥長孫覽司馬又爲蜀王府長史太僕卿判黃門侍郎上開府儀同三司梁州刺史等官皆不書蓋其闕也又據碑茂爲蜀王府長史而傳云爲益州總管司馬碑爲太僕卿而傳云太府皆史家之謬也茂字延茂史亦闕金石萃編按集古錄茂字延茂今碑拓已泐此四字但據額題梁州使君陳公文中序官位事蹟與隋書陳茂傳合知其爲陳茂碑也碑云太祖文皇帝是指周太祖又云公以賈誼登朝之歲終軍奉使之年展綵於濫觴之辰效官於尺木之始

是茂從隋高祖入仕周太祖之始年甫二十也傳稱高祖爲隋國公引爲寮佐是指隋高祖高祖之父忠佐周爲柱國隋國公以周武帝天和三年薨高祖乃襲爵碑云皇上嗣○霸國將興帝業云云卽此時也碑又云周武帝薄伐東秦席捲河北聲振○坂勢超垓下隋高祖紀云建德中率水軍三萬破齊師於河橋明年從帝平齊進位柱國周武帝紀云建德四年七月詔伐齊隋國公楊堅廣寧公薛迴舟師三萬自渭入河九月班師五年十月帝總戎東伐獻俘傳云從高祖與齊師戰於晉

州賊甚盛高祖挑戰茂固止高祖拔刀斫其額詞氣不撓高祖厚加敬禮其後官至上士卽碑所云公衝寇之氣臨危奮發○○之誠造次先表也周武帝紀云建德六年二月高潛在冀擁兵未下遣上柱國齊王憲上柱國隋公楊堅率軍討平之隋高祖紀云從宇文憲破齊任城王高潛於冀州除定州總管卽碑云上爲定州總管公任總管府司錄兼定州贊治也高祖紀云尋轉亳州總管卽碑云上○○總管公除總管府司錄也高祖紀云宣帝卽位以后父徵拜上柱國大司馬周宣帝紀



云宣政元年六月卽位立妃楊氏爲皇后七月以柱國南兗州總管楊堅爲上柱國大司馬卽碑云上爲上柱國公遷府長史也高祖紀云靜帝幼沖未能親理政事以高祖皇后之父衆望所歸拜高祖假黃鉞左大丞相百官總已而聽焉周靜帝紀云大象二年五月上柱國揚州總管隋國公爲左大丞相十二月進爵爲王以二十郡爲隋國傳云高祖爲丞相委以心膂卽碑云上爲大丞相隋王公除府掾治十二府長史也周靜帝紀云大定元年二月隋王堅稱尊號帝遜於別宮高祖紀云

開皇元年二月上自相府入宮卽皇帝位傳云高祖受禪拜給事黃門侍郎封魏城縣男每典機密在宮十餘年轉益州總管司馬遷大府卿進爵子後數載卒於官證之以碑同異互見而攷之高祖紀竟無一語及茂者碑又云委質皇家卅餘載蓋自二十歲入仕至卒年六十一正四十餘年也碑泐其薨年月日以茂入仕之年二十薨年六十一計之碑有太祖文皇帝爲大將軍譬○文之○○朝若晉室之藩魏國望重斯表佳氣○○云云攷周太祖之爲大將軍在魏孝武永熙三年碑似

指茂初生之時下缺四十餘字當是序茂少年時事則  
茂當生於永熙三年甲寅薨於隋開皇十四年甲寅也  
卽以其年歸葬碑當立於是年猗氏縣隋地理志屬蒲  
州碑泐蒲字

司空裴寂墓碑 通志云貞觀中碑文虞世南撰歐陽詢  
書舊在墓前今無

揚州長史薛寶積碑 周長壽二年正書額篆書在縣北  
平宜村東南一里許竹崦盒金石目錄云寶刻叢編揚  
州都督府長史薛寶積碑王處撰文林郎王應坦書長

陽春集卷之二  
壽中立在河中府是碑漫漶過甚惟額書大唐故揚州  
長府薛府君之碑十二字尙完好知卽寶積碑無疑通  
志云碑僅存上半連額剝泐之餘可辨者約二百字諸  
家著錄並列武周長壽時而額題大唐終可疑也今審  
此碑書碑人文林郎王庭璋六字清晰可辨實非應坦  
經幢 開元六年在西閣村道甯寺

尙書薛道實碑 開元十七年分書額篆書大唐隋故尙  
書禮部侍郎○○公薛君碑在縣北平宜村東北里許  
唐比丘尼三娘造像 開○十七年舊在霍村敷德寺開

下缺一字審字體確是唐代物民國十一年縣知事俞

家驥移皮城內鐘樓

慈州文城縣令王景祚並仲子郴州郴縣丞墓碣序 大

歷十三年王顏撰分書王卓神道碑陰祚文曰王府君諱景

者太始原自四也十帝一舉后稷之平後王之孫其父泄未立而卒顯平姓

莊王崩赤當嗣為叔父桓王廢而牧自立赤為八大夫及

晉牧并州龜生喬自喬至第四代七十漢末為并州刺史毛生

室十南八遷代祖卓魏為河東太守晉遷司空遂封猗氏侯屬晉

今城西二里毛墓在今猗氏縣西南一里泉有太原居河東

生在今○長曰魏定宗氏族僉以季太原俱王氏為文肅文肅孫○市

尙勅書柳沖二祖衣後譜第沖泉○小○蓋府原君高元初○祖○廣州○

不督云亥河東望州○都○督於壽陽公○方○平也並今著勳業○稱○為府桑泉代

○祖○定○州○百刺步內在大父諱子○欽承定○州之蔭墓不在仕早世原○

烈女考景惇性慈仁又樂道不仕正貌莊嚴而敬居二處子與

必用及飲義家衣服恒精也盛謂動必由禮賓焉親於桑泉私第見

際豎○僮○濟○退○害○盜○穴○要○女○奴○躬○領○許○蓋○穴○壞○封○舉○

曰益楊氏玉環之垢事是積仁累德之聞應磨非○乃○金○之○也○時○或

寇比逆于并家○譜歸失矣故前定州之家○之府寶君由宿衛官再命陷

於至河慈內夫文城縣令楊氏齡生二十子開二元二長子四年正月子厭家	簡真後夫縣人丞天與由國氏子明子經再命終鄭州營澤縣主	簿絕瑗瑰終不仕仲子少而殊異盛而奇○負○不行○已也○深	夫仁臨事也高乎義尊賢右德好古尚奇○負○不行○已也○深	蓄兼濟之志未弱冠補國守子○累○以○經○舉○祿○時○開○元○初○詔	河○滄○廣○屯○田○委○節○使○署○官○守○子○累○以○經○舉○祿○時○開○元○初○詔	縣○丞○將○充○節○度○使○張○公○守○珪○營○田○巡○官○復○轉○授○郴○州○郴○縣○	丞○開○元○二○年○丙○子○七○日○厭○家○於○郴○享○齡○四○十○奔○走	阻○遠○號○毀○遺○性○四○十○年○二○月○七○日○厭○家○於○郴○享○齡○四○十○奔○走	人○廣○平○程○氏○父○戴○氏○叔○舅○沐○璇○擊○天○保○初○自○尚○書○郎○出○饒	毅○妣○皇○譙○縣○君○戴○氏○叔○舅○沐○璇○擊○天○保○初○自○尚○書○郎○出○饒	法○陽○穎○川○二○郡○守○夫○人○勤○中○也○饋○為○時○婦○閑○師○享○齡○三○十○一○時○先	歸○穎○也○德○禮○嚴○惠○服○人○勤○中○也○饋○為○時○婦○閑○師○享○齡○三○十○一○時○先	家○三○子○長○早○天○次○顏○幼○安○顏○七○禍○延○二○十○尊○日○府○君○九○歲○一○時○女○諸	郴○縣○府○君○厭○家○次○顏○幼○安○顏○七○禍○延○二○十○尊○日○府○君○九○歲○一○時○女○諸
--------------------------------	---------------------------	----------------------------	----------------------------	----------------------------------	---	--	---------------------------------------	---	---	---	---	---	---	---

○父○媛○至○自○河○內○諸○父○護○舅○更○養○垂○千○成○伯○里○歸○潛○姑○桑○泉○顏○等○立○

縣晏京兆府同學而卒顏進河士補太縣尉書轉年河大歷己酉氏

報伯姊返姑真享不年復榮不四孝不天意命當絕俗養不不待

○也○感○禮○力○有○養○合○志○然○利○公○家○後○之○俸○終○代○仁○者○之○色○粟○俄○有○思

二浮財一千里峨不此用大歷八年春卜地于臨晉縣西從

不抑謀而夢占九慰年春授同神州靈陽縣令去乙卯秋七月里

甲自河內奉遷文城尊靈屈茲新塋八月遷王戌朔廿三日

夫隴人合祔後北王堂順政伯陪西李氏皇右殤子晏陪

陽隱縣之孫皇朝散大夫京兆府威陽縣令偃之州女別駕翬



百之步內也。有大歷六年卒，私難於洛邑，墳也。邨山，玄前史，深西。惟三  
 始祖周族內多慶也。始叢而為聖王，列辟終散而為忠臣。  
 孝子宗族內多慶也。始叢而為聖王，列辟終散而為忠臣。  
 見十四年，寶安西郭璞，庭二氏，為淮水實統論信矣。嗚乎！魏  
 國之風俗，不儉不薄，中禮所固，不知日薄，俗自為也。望不棄而  
 是稱宜，不為薄，俗所固，不知日薄，俗自為也。望不棄而  
 陰罪重，陽罪輕。顏無行，而竊聞陰功，無嗣而多重。有陰罪輕  
 矣。故鑑堅石，不殺。顏無行，而竊聞陰功，無嗣而多重。有陰罪輕  
 矣。故鑑堅石，不殺。顏無行，而竊聞陰功，無嗣而多重。有陰罪輕

追樹十八代祖晉司空河東太守猗氏侯王卓碑 貞元

十七年韋縱正書王顏撰在縣東城西村官道傍

始文祖曰

無名道之出也。曾孫有周之先也。宗積也。仁夫成國。德有積。德必成。先聖

若后稷播種。蒸人乃粒。周先之也。宗積也。仁夫成國。德有積。德必成。先聖

與日至。文王周允。著為天家。法焉。開國。德澤之源。流為國制。易

度內而已。厥後。百子孫。因易。王顯。姓始。自豈。四十三。一代。祖中。周八。平百

王孫赤。其父泄。未立。而卒。及莊王崩。赤當嗣。遂奔。晉桓。用王

林。廢而自立。用赤。為大夫。及莊王崩。赤當嗣。遂奔。晉桓。用王

代。通。州。牧。自。赤。代。至。龜。八。代。晉。侯。牧。文。并。釗。州。生。龜。叔。僑。叔。至。僑。文。生。釗。伯。十。明。六

伯明。生。老。河。東。太守。遷。守。征。西。封。大。將。軍。老。夫。生。卓。卓。字。世。盛

父仲賢。任。雍。州。牧。卓。翁。年。七。十。九。薨。於。河。東。時。屬。劉。聰

石勒。亂。太原。晉。陽。不。遂。歸。葬。十。九。薨。於。河。東。時。屬。劉。聰

氏。為。桑。泉。縣。今。古。太。原。塚。墓。在。縣。東。南。州。解。上。古。城。西。二。里。邪。至

今。子。孫。族。焉。自。古。太。原。塚。墓。在。縣。東。南。州。解。上。古。城。西。二。里。邪。至

鄉。後。魏。定。氏。族。僉。以。太。原。王。族。為。天。下。首。姓。故。古。今。時。東

有。鼎。蓋。之。名。蓋。謂。蓋。海。內。甲。族。著。姓。也。首。我。卓。翁。古。葬。今。時。東

乎子况孫本族奕業生金將相玉而映洪源之長派碧不鼎蓋清河東官著姓	衆者流賊屬兼府之澄而耳順方止水絕終身蔭之者耻徭戍蹟不暇而滂而萬里爲	地交鎮隘有迫死使之苦更接開二元庭丞驅相出張公說之越外認蓋魏	河陽封燕國公大歷中左相一縉且叔爲縉叔邪公封沒之國而公望且	况平沈也如燕齊兩公皆又名世大賢社稷重器尙爾姓爲之也	公祖白周靈王太子而異使司曠朝周見太子晉後且方平	十五曠謂太子色赤謂元精下曠全眞上賓則知年賓於帝果	爲已修譜者仙務神奇祖先競中而太子始晉後凡不其妄歟凡是稱各	太原王奉朝請善翁平王之孫赤翁之後前已府詳儀之明三矣司
--------------------------------	-----------------------------------	-------------------------------	------------------------------	---------------------------	-------------------------	--------------------------	------------------------------	----------------------------

奇車騎將身長軍八尺北道高大僧總管蒲州隋桑泉人今有或碑有僧延公延讚

曰德與天全皆盛德佛半桑泉房闕明都督部員外郎廣州

靈叔詩曰人房右丞維擊天左相雖承詩人偉文耀言時或有定上

論虞鄉房安西北庭州節度正見三叔武德冠時如僅入不仕

也然因有官婚見或棄鄉族迷失宗望亦已往之慶在晉司徒窮

為也又誠宗人曰勿三若代結不婚仕不如學不貴無識失婚富無譜不慎勿

無墳墓不進修士官歷是臺省事除洛陽令移典杭州戒之大理之

少卿拜正經中丞出為志於子史嘗歎大道字為久隱澆漓十時

古卷有碑於廟代直軒宗子四縣離居每銘用正於月七日一塚合墓

之來祭風俗儉不勳中禮廢周之今日孫日方失其序顏實永痛力建

豐碑有慶之德焉四歸流逝者之仁銘曰正迷宗一者宗之晉代

伏旌垂慶之德焉四歸流逝者之仁銘曰正迷宗一者宗之晉代

三祖慶所鍾顯魂此河東孫謀克  
著  
靳州刺史兼御史中丞孫杲碑 元和己丑年湛賁撰民

國十年縣西西齊永村出土知事俞家驥移皮城內鐘

樓

靳州刺史兼御史中丞孫府君夫人河內常氏碑 元和

五年郝弘度撰民國十年縣西西齊永村出土知事俞

家驥移皮城內鐘樓

甘泉寺僧惠信造尊勝陀羅尼經幢讚并序 咸通八年

石分八面鄉貢進士戴從規撰舊在縣東北亭東村石

造像廟前民國十一年縣知事俞家驥移皮城內鐘樓

經幢 乾符六年舊在縣北南暢村佛爺廟前民國十一

年縣知事俞家驥移皮城內鐘樓

經幢殘石 無年月僅存闍羅王等二十三字審爲唐民

國十一年縣知事俞家驥得於城內官池岸畔移皮鐘

樓

殘經幢 年月漫漶存者僅十數字審爲唐在坑西村聖

壽寺

殘經幢 石質斷缺年月漫漶舊在縣東北亭東村石造  
像廟前民國十一年縣知事俞家驥移皮城內鐘樓

殘經幢 年月漫漶審字體當是唐宋時物舊在縣西小  
村村外民國十一年縣知事俞家驥移皮城內鐘樓

佛頂尊勝陀羅尼經幢 太平興國六年石分八面舊在  
縣北大嶷山聖壽寺前榛莽中民國十一年縣知事俞  
家驥移皮城內鐘樓

經幢 一元豐七年正月一年月漫漶均在縣北平宜村

西釋迦寺外

殘經幢 天眷二年舊在城內後寺瓦礫中民國十一年  
縣知事俞家驥移皮城內鐘樓舊志藝文門載後寺廡  
下有經幢石既殘缺字亦剝落經末署總章年號知爲  
唐代物邑令錢官俊爲文以記其事今遍訪寺內只有  
金天眷殘經幢而無總章時物豈移置他處歟抑爲人  
易換歟代遠年湮不可得而知也

樊欽樊憲兄弟合造佛頂尊勝陀羅尼經幢 貞祐乙亥  
年石分八面舊在縣西角杯村聖壽寺民國十一年縣



知事俞家驥移庠城內鐘樓

晉文公廟碑 延祐三年薛天輔撰在縣北婆兒村廟已  
毀碑尚存

奉仙宮碑 至正九年在北貫底村奉仙宮內

唐總章經幢跋 清同治八年邑令錢官俊撰書舊在城  
內慈雲寺民國初元移置南門外風神廟十一年縣知

事俞家驥移庠鐘樓

參看天眷殘經幢條

俞家驥曰金石一類自趙宋歐陽文忠洪文惠諸大儒  
集錄而後代有專書前清乾嘉諸老輩講求金石至以

名家者接踵相望良以字形字音厯三代秦漢六朝幾經遷變後世握槩懷鉛之士又不免以疑傳疑南北朝之際尙在分楷過渡時代得其時石刻之精者可以訂經典字類之異同其中年號及官名地名人名並可以證史冊之訛補圖經之缺正不獨賞其文格摹其字體已也昔埃及發見畫像而歐美學子遂羣知網羅貞石以考社會之沿流覘人類之進化近年北朝石刻購運於歐美各國者指不勝屈迭奉部令咨取各省金石拓本岌岌焉以保存古刻列爲行政範圍今因纂輯縣志

公餘之暇聞有破廟荒村及前代廢塚輒與宣講高君  
銘瑛策蹇而往瓦礫之場翻檢必遍時僅三月已獲古  
刻三十有三皆從前著錄家未見之品其名爲著錄所  
有而拓本尙未流傳之霍揚碑不在其內由是推之縣  
境深谷闕崖沈湮者何可勝數所願在籍士紳對於已  
發見者留心維護未發見者隨時搜羅則後之所見必  
且益廣於今其以是書爲椎輪者又何可限量也

臨晉縣志卷十三終

臨晉縣志卷十四

記三

舊聞記

漢書志五行譏祥必以某異爲某事之應後世史家多變其例殆謂天道遠人道邇穿鑿附會殊不可必然惠迪吉從逆凶晝察夜觀天人感應之理固不爽也近世新學發明直謂天變不足畏幾欲舉歷史五行志而淘汰之毋乃不可乎今彙輯舊聞備諸志乘以供留心往事者之研究焉

明成化二年大饑人相食次年六月始雨 弘治十年大  
旱 嘉靖七年大旱蝗十一年大旱荐饑十五年六月大  
水十六年雨雹如雞卵周二十餘里三十四年十二月十  
二日夜地震有聲如雷自西北來地裂井溢城郭廬舍盡  
傾壓死人畜無算嗣微震不止天寒民露處搶掠大起時  
流言拘刷童男女不越月民間嫁娶殆盡三十五年六月  
黑眚見時有黑氣其疾如風雖密室無不至至則人皆昏  
迷或手足面膚被傷卽出黃水徧城驚擾亦卒無眞跡說  
者謂地震壓死強魂理或然也 隆慶四年夏大水自城

以北波濤如雷官民廬舍傾壞數百知縣史邦直請塞北門 萬厯元年七月山水數丈自兩瀑而下漂溢王官祠宇或見風雨之中二龍相戲八年九月初一日隕霜殺稼十五年蝗大饑至有棄嬰兒於野者朝廷賑之十六年瘟疫死者無算至不相弔問夏麥雖登無人收穫饑民偶或飽食死者復十之三四二十三年水旱並災二十五年八月井沸池溢泛濫橫流幾數丈踰時方止說者謂之水淫主多雨是秋果應三十七年大旱饑四十一年旱災四十四年春夏大旱蝗 崇禎四年春正月日將入赤如血紅

光射地六年夏麥不登秋大旱七年饑民剝食樹皮殆盡  
八年大疫狼羣行食人十一年六月蝗十三年春不雨至  
於六月赤地如焚五姓湖水涸秋無禾木皮草根剝掘殆  
盡人相食僻巷無敢獨行者次年三月大疫夏麥熟人食  
之多病黃腫死十五年六月初四日地震十六年十二月  
流賊李自成襲陷蒲州百姓聞風逃竄知縣馬魁選亦遁  
十七年正月十八日逆闖至縣置僞令柳化楠繫累鄉官  
子弟勒餉夾檟炮烙備極慘毒六月初二日逆闖自京敗  
回復過縣西走仍將追餉未完諸紳帶入長安十月清兵



至僞令柳化楠攜印西逃

清順治四年六月蝗 康熙元年秋霖雨彌月城垣廬舍  
十傾六七十年夏大熱有暍死者十一年蟲十七年大雪  
深數尺十八年秋大雨霖二十餘日牆屋盡圯二十二年  
十月地震二十五年二月西關龍王廟會有書賈攜書就  
廟內布席待售忽旋風自廟門入盡捲其書入空中仰視  
片片飛揚以次而上傾之不見其旁尙有同賈者所攤書  
端然不動人莫測所以然 雍正三年黃河清月餘七年  
卿雲見 乾隆十年涑水大溢十三年麥秋俱無十四年

五月大雨波水入城牆屋傾圮無數是年大有二十四年  
秋旱無禾二十五年麥秀已齊大雪尺許卒無害二十六  
年七月涑水溢三十四年秋大熟四十九年歲饑五十九  
年歲饑 嘉慶六年涑河大決九年至十二年大饑十八  
年大雨十晝夜前後綿延二十餘日二十年九月十九日  
地大震北城門樓傾塌 道光元年瘟疫五年秋大熟十  
五年歲歉十九年六月初酷熱異常初六日泰山廟會有  
行至中途熱死者是日午後得雨一陣方止二十六年夏  
秋大旱二麥未種二十七年秋大熟 咸豐十一年七月

長星現南北數十丈直抵天河 同治元年二月初隕黑  
霜殺麥十一日大雨麥復旁生七月星隕如雨二年陝獨  
滋事邑人在陝者盡行逃歸設立民團沿河防堵五年麥  
歉收秋熟九月二十四日晚天裂有光聲如雷六年髮逆  
餘黨由陝分竄河津等處距縣數十里城上設槍炮夜間  
燈火不斷居民多移城內 光緒三年夏秋不雨西至陝  
南至豫東北至省赤地千里荒旱異常民苦無食往往衣  
履完整一蹶輒不復起又多疫疾傳染幾於全家加以盜  
賊蠶起肆行搶掠民不堪命鬻妻賣子去產變業艱苦情

形不堪言狀當道奏免錢糧開放倉穀並發帑勸捐多方賑濟民有不及至賑所而倒斃半途者四年春夏荒旱尤甚賣地一畝不得一金而糴粟一斗需三四金三月四鄉設局平糶而戶口已流亡過半矣五年田中多鼠害粟兼有狼犬相率噬人村市無敢獨行者連歲奇災爲數百年所未有七年四月朔日食晝晦恆星皆見八年冬十二月大雪以風平地深數尺車馬不通者逾月九年歲歉十八年夏旱多蝗冬奇寒黃河結冰自龍門至於底柱行人車馬履冰渡柘榴柿樹多凍死十九年夾馬口河岸移西十

餘里二十一年六月大雨坡水暴發毀官民廬舍數百間  
二十六年自夏徂秋無雨澤赤地千里旱荒異常六月拳  
匪起德宗及太后西巡八月下旬經臨晉供億頗繁信宿  
去九月知縣姚楷開倉賑濟設平糶局於城內十二月凍  
霧彌漫草木盡白俗號龍霜二十七年三月雨雹大如卵  
繼得甘雨秋大熟畝收兩石有奇至三石者二十九年喉  
症流行小兒尤甚天傷者衆三十三年秋酷熱異常 宣  
統三年春柏葉盡枯夏彗星見長數丈九月民軍起義十  
一月秦軍東渡由臨晉攻運城十二月晉軍南下由河津

至臨晉旋赴河東

民國元年三月平芮土匪起攻虞鄉陷臨晉二年麥秋減收五年蝗濱河一帶其飛蔽天知事賈孝斌派巡警率民捕除數日淨盡秋冬雨澤愆期六年麥歉收六月陝西土匪郭堅渡河居民奔避牲畜被掠者甚衆七年六月雨雹南鄉城子埝諸村棉花摧殘無遺田間多鼠食苗殆盡八年春隕霜殺麥夏秋苦旱九年旱麥禾歉收知事俞家驥開倉放賑八月得雨種麥十月地震牆房有傾圮者十年歲稔六月大雨如注坡水暴至城關盡成澤國

## 記四

### 雜記

人非一途事非一致無類可入而又不可沒者則歸諸雜記此編書之體例也王志雜記二篇幾占全書之半良由正編專尚詞華凡艱於組織或節錄舊志概收雜記中故不免凌亂之弊今既一切廓清分載各門矣其未載者人物中則有庸賢方外耆壽諸條藝文中則有雖無關本邑事實而特重其人與文弗忍割愛者並記於此以示別於文選云

厲賢 三則

成德 霍州人寄籍懷柔字元修號赤公崇禎進士姚希  
孟所取士也清操絕俗疾惡如仇與文震孟友善授滋陽  
令忤溫體仁體仁嗾御史劾罷之逮部一再杖下獄時全  
家居順義順義城破父文桂遇害一門六命先後死焉德  
遣戍莊浪過樊橋遇故人荆爾植爾挺留數日去明年戍  
回僑厲臨植挺爲館於所親楊氏著書講學從者甚衆每  
談忠孝大義豎髮揚眉鼓掌大叫曰諸生不當如是耶一  
門死節六命行略殆作於斯時也閱七年以詹兆恆薦補



如皋令擢兵部主事晉郎中闖賊犯闕失帝所在趨至午門見兵部尙書張縉彥自賊所出以首觸其胸痛詈之俄聞帝崩奔奠梓宮於東華門茶棚下號慟失聲觸地流血賊環刃衷之不爲動歸而縊母與妾妹皆縊至是又闔門死難贈光祿卿諡忠毅清諡介愍

一門死節六命行略

成德

先祖成公諱延年號玉山先外祖張公諱炳號鹿崗先嚴諱文桂字子英號仰玉原籍俱平陽霍州人也德不肖生最晚宗祊之派莫知所出惟聞先嚴生前數言先

祖與先外祖居同巷讀書同學激昂伉爽不肯向人作  
低回佻倪之色又雅同志趣先外祖長先祖數歲先祖  
以兄呼之先外祖年八十出遊密雲爲商不快去而明  
農迺寄籍於懷柔寅洞里東邵渠莊會先祖以吏員選  
官先嚴年方十四攜之入都先祖知先外祖卜居邵渠  
單騎往會相見甚歡酒酣談欲結婚外祖慨然許之既  
而曰熒熒一女不忍離家入贅可也先祖亦慨然許之  
接先嚴至邵渠遂完婚年餘生不肖德而先祖之官秦  
中先嚴復隨入秦無何而先祖離任再歸邵渠年餘歿

矣先嚴日爲外家營綜庶務形神備瘁暇則手王元美  
廿史類編一冊於石門大峪諸山朗誦高吟一日閱至  
秦檜害岳忠武事倏而大哭倏而大罵耘田諸傭簇聚  
而問之則爲諸傭述其顛末哭罵如初諸傭亦無不哭  
且罵者乙丑之交璫禍肆起逆督閻鳴泰建魏監祠於  
天仙山縣令柳茂林以贊禮生強德德抗不爲動先嚴  
密語德曰兒不讀文文山正氣歌乎頭可斷祠不可拜  
也厥後縣令聞之幾成大禍族舅張履禎乘隙健訟年  
餘不歇數入都具告廠衛會熹宗皇帝崩乃免云德於

庚辛叨中兩試先嚴教之曰兒當學做人勿學做官德  
任山東滋陽縣先嚴就養癸酉秋南場奸僞事露主試  
者爲丁進烏程私人也授意門生兗州府推官鄭光昌  
誣繕一疏將加功於先師姚現聞而文先生湛持孔先  
生玉橫皆與焉光昌出疏相商德勃然曰此熹宗皇帝  
留佚之君子也大人將欲遺臭萬年乎光昌唯唯僅出  
揭而已光昌考選有礙進訊其不具疏之故而德禍從  
此始矣甲戌夏御史嶧縣褚德培給事沂州宋之普爲  
其同門王國賓討補本府缺卽將二處新餉二萬有奇

泗派滋陽寧陽濟寧平陰等七州縣德五具稟國賓再  
申文各院一移書褚宋以去就爭之會屯院蕭公奔輔  
駐節寧陽諸生講哀公問於有若一章聲淚憤集終有  
留忠良除狐媚諸語蕭怪焉向守道湯道衡巡道冒公  
起宗訊之湯噤不發聲冒公獨正色答曰諸生爲滋陽  
伸正氣耳時王國賓在坐幾無人色次日曲阜謁聖廟  
七處士民千餘環德而拜去國賓僅數十步耳德固知  
禍不可解回家以辭官稟先嚴先嚴教德曰兒兩舉差  
快父心殺人媚人仁者不爲况代奸臣殺善類代惡官

殺萬民哉有榮有辱無榮無辱但兒告之父矣可不謀  
之師友請之上官乎德遵父言商於先師姚現聞同年  
馬君嘗辭官於直指王公邦柱者再王硬駁以安身無  
恙師友力勸以清議有歸後院禹好善先巡漕時以薦  
烏程之弟育仁甚獲寵愛而總憲唐世濟本烏程同邑  
至戚山東按差挨次應屬金公光辰乃易爲好善又王  
國賓同府人也入境特參夫前院薦德在十一月後院  
劾德在十二月且好善巡漕曾薦德在十月一季之間  
貪廉易位薦在前劾在後奇矣况劾之人又卽薦之人

乎則愈奇比德奉旨拿問前曾具天變可畏一疏通政  
抑不與上而按察之逮者至矣按察爲顧元鏡布政爲  
勞永嘉俱係烏程私人哀哉德也素忌於溫史開釁於  
李王上籠以顧勞中間之緒宋卽鐵鍊成身其能當八  
小人之磨牙淬劍乎德赴部在乙亥四月十四日一家  
哭聲動地天日爲昏覓畜長往時或父子終日不食先  
嚴坦坦自如無幾微見於顏面德申理前疏真情使老  
母入都實先嚴主之卽德具辨疏者七次先嚴寓居順  
義草稿無不見也德一杖於錦衣衛鄒大金吾薄責細

訊杖罷涕出再杖於西長安門外董昆則色色加功去死無多三待杖於右府成安伯爲右簽書恨德觀政時揭其受人投獻奉旨罰俸且承烏程意送監蓋從無此例也德出監在八月十五是日敵攻順義城破之前此先嚴令僕輩預懸數十繩套於屋梁又潛掘一大窖於屋下勢急矣德六妹季白跪告先嚴令匿入窖內先嚴不從曰諸婦牽連在下我兒我兒老父豈以顛沛違禮節哉未幾敵排門而入向先嚴索銀先嚴以魯王歷賜銀盃三十餘個付之不爲止先嚴仰天大罵以首觸之



曰速殺我速殺我因遇害德六妹夜半賊去始知死狀  
哭曰父死矣我何用生爲德二妾蕭氏童氏又哭曰翁  
死矣我何用生爲相繼自縊死德妻劉氏先勒幼女二  
小死旋自縊被惡婢捨兒者解救勸阻得不死德是月  
二十四日徒步入順義城夜下二鼓聞哭聲壯烈宛若  
先嚴三更方止幸老母入京看德第七妹並德長女大  
小曾另避深山俱免難焉耳時烏程囑成安解役星火  
催迫一家六命僅以楊柳作棺浮寄家園不肖已爲府  
差刻逼西邁矣後德妻畢竟以王國賓懸坐贓銀六千

七百有奇義不受追呼縊死時當五月間傳聞尸香三日焉越二年同門在京者王三山詹月如高鸞磯楊無山吳永調諸年兄僉同先師華公未齋之命釀資助葬姚師崐斗首捐十金而從不識面諸君子如黃公石齋李公括蒼馮公艸仙王公介清周公仲馭曹公履垣靳公冽泉陳公幾亭咸來助之同年兄吳駿公楊機部王炳藜葛錦閩吳門姚世兄文初梁溪布衣黃公諱繼祖者又咸來助之約賻金一百九十有奇六柩始得歸土而不肖德罪惡通天未獲生代父命以死葬憑父柩而

哭行且覩顏旅瑣食息歲月天地間有是人  
是子乎日者聖鑒旁達原赦有路會當曲沃  
之行夜宿楊生瑞瓜園伏枕摹文淚浹席上  
先嚴諸泛泛小節概不欲書止敬舉其大者  
惟德本不足採伏乞當代儒宗鴻筆君子念  
襄事古處之誼憐先嚴殉難之烈哀一家六  
命刀頭雉經總緣不肖不肯降首俯從殺人  
媚人之事故傾陷至此或表傳誄輓垂賜片  
言以昭不朽哀哉哀哉今而後知廉吏可爲  
而不可爲貪吏不可爲而可爲優孟之言固  
當官之鑒也

王俊襟明天順間襄垣王遜燁自代徙封於蒲宗人皆嫻  
文章俊襟字若訥尤博雅不慕榮利於五姓湖築室卜居  
與詩人隱客嘯詠其間自號蘆花散人其詩名佩蘭集嘗  
自記曰地偏心遠軒榻皆幽煙波渺瀰沙鳥上下秋則蘆  
花吹雪夏則蓮葉披雲把釣浮舟開窻待月村樵漁子共  
話田園可以忘老豈直世榮之俱淡耶

王志

周明德河南南陽人乾隆初來遊河中其子遐齡連爲榮  
河臨晉永濟三邑宰明德皆至其地嘗微服間行縣中求  
民疾苦歸卽語其子使除去之利民者卽使興之

王志

方外 三則

羅通微臨晉人母趙氏妊時有雙鶴翼行既生骨相嶮巖  
稍長入山樵薪遇閭使君案授以幻養之術遂冠褐於五  
老峯之遊仙觀學步虛絕粒今太乙峯南步虛坪其地也  
後使君出牧吉州召通微及境有雙鶴樂聲自玉笥山來  
迎既就館一夕月色皎然忽騰空吟嘯而去使君表其事  
詔吉州立真人堂尋改降生之羅村爲蓮臺村

通志

神迥臨晉人俗姓田貞觀間流化岷峨爲道俗宗師

通志

房居士明初遯迹中條操行動苦于肅愍撫山西訪以吉

凶事不答去謂弟子曰此公不善其終人以爲神

王志

### 耆壽

暢景岷靳家莊人醇謹端方年八十九歲五世同堂清嘉慶年奏給匾額緞匹銀兩恆升景岷子以孝聞子孫數十人教之有方亦五世同堂年八十四聯奎恆升子恪守家法與人無競年七十八已親見四世矣

楊建樾字宜山樊橋驛人年八十有八五世同堂一家百口以雍睦聞

王惟和以孝友稱清高宗幸五臺召問耆老賜八品服

以上

志均 艾

孝友彙記 王正茂曰予修邑乘邑人爭以孝義舉有實  
行可紀者載入正編無實行可紀而人口嘖嘖者亦未必  
其誑也因彙而記之如生員李林棠生員李樹棠生員韓  
如梅樊之甫邵全章胡則九胡應臻胡皋吳家輝王志清  
周積萬籍登和孫如洸閣重興暢景福謝御珪衛情張雲  
川杜明義范居恭王齊雍王子卿皆以孝義舉者也生員  
張藩甸生員李超廩生侯維域王世明荆安正謝敦禮樊  
林翰姚汝標張大臣田榆衛炫郭成藩王兆祉李克元衛

立中楊教侯維堯李君佐皆以謹厚舉者也大抵或存或  
亡事例不一惟以孝義謹厚概之

張大經 少學於猗氏郭九齡齡固有學行經既鄉貢年  
將老矣執弟子禮無間齡死齊衰往哭之哀

楊喬南 王桂弟子也桂死鮮克家子生平多著作喬南  
什襲之有葵書上之請備館閣選

王福王寅 明之氓隸也夔甚值崇禎兵荒掘地爲深塹  
跌焉或以糜餉之不受兄弟偕死

以上均王志

謝體觀跋疆域篇後 臨邑之未分也東西廣五十里南



北袤一百二十里蓋古子男之封也雖地當孔道輪蹄絡繹而候人之需供給不匱則以膏腴之田多在邑南以兩邑而應一驛宜其然矣自前宰劉君政令嚴酷赤子獸駭萑苻告警遂使繡衣持斧勦撫相機分縣之議於是而定夫民之變也非地勢遼闊鞭長不及繇馭之不得其道也聞劉君將陞廳事先飲醇酒數斗箠楚亂下受杖者血汚淋漓街衢殷紅至挺而走險受誅者七八人而劉君亦爲荒谷之莫敖矣身亡邑蹙能不痛恨於曩昔哉

王恭先介右人史略序 古史之體春秋而已自子長變

編年爲紀傳作者代起皆禘史記也第稱文繁學者難徧識溫公通鑑出而全史并包編年之體亦復議者謂於春秋勸懲之法有未盡合者紫陽踵其遺書更立義例綱舉目張經傳之體備矣自是史鑑分途隳楛舊史者東萊詳節是也攔撫綱鑑者鳳洲會纂是也乃若鎔鑄經史會歸綱目采擇博考覈詳則介子右人史略一書深得溫文二公心法右人家富遺書能力學窮考盡氣志不少休是書首於帝王著統紀后妃諸王以次附分封侯國又次之僭國藩鎮篡賊叛逆莫不識其始末正以功罪至於漢壯繆

侯之死也則書曰呂蒙入寇江陵守將關羽自攻樊還死  
之因事表心特異舊文則亦綱目特書之變例也夫代不  
能有治而無亂也統不能有正而無閏也世儒不察妄測  
天命以河汾之賢其作元經也曰春秋抗王以尊魯元經  
抗帝以尊中國斷南北之疑挈正統而歸於拓拔氏曰亂  
離瘼矣吾誰適歸斯言諄矣且彼劉石苻姚何一非居先  
王之國而子先王之民耶宋王欽若撰册府元龜以宗魏  
書中索頭島夸之號事涉不經請詔削去詎謂文中見出  
欽若下哉嗚呼天下之生久矣紫色蠶聲餘分閏位天故

生之以資聖主之驅除作者能究心於此卽無統之國亦有樂厯篡賊叛逆亦有年號天道人事倚伏乘除莫不默應皇極之數蓋天不變道亦不變天卽變道仍不變如斯而已然後知此書匪徒粹羣言以便誦也嚴理欲而昭勸戒大經大法存焉矣

李世直泌水贈別詩序 泌水蓋泚水之訛云陳與宛不相蒙好事者往往辨之然附會已成攘奪之陋爰及形勝遂使居是邦者不得不篤信詩人於是樂飢之旨相奉爲此中治譜矣僕旣慵且拙器用不適於盤錯非借空山茂

草之靈將有不可以慵不可以拙者雖欲策羸茹糲待罪  
於七年之久其可得乎然則泌水未嘗負僕僕實負泌水  
矣倘以不溫不飽之隙尋怨於荒殘亦將絃歌有知得以  
非夷非惠之身過督乎尸素竊念三河風雨四野烟霞以  
僕雄長乎其間邀有歲月當其西臨上陌指顧隆中躬耕  
之廬若遠若近其南則盤山峨然淮水蔡水所從出也北  
眺仙陂煙水蒼茫召父之利賴猶有存者東歷沙河訪吳  
砦之舊址思雪夜之勛高慷慨奮往廳事西偏間嘗運甓  
誅茅闢有半畝之宮上棟下宇花明竹翠主人日高而起

脫巾忘盥飽園中之杞菊聆樹上之禽言坐於斯眠於斯  
咏歌於斯種種領略不減柴村清興長吏俗人徒虛語耳  
古之出而仕於四方者每樂其風土而寄氏族長子孫焉  
不僅卜桐鄉俎豆已也舊游眷戀夢魂以之人情不遠如  
是僕旦暮舍此而歸矣君子之於人也相別而贈以言山  
川草木物實有情而臨岐默默忍乎哉故凡七年中耳之  
所聞目之所覩足跡之所涉懷想之所存各爲刻畫以當  
扳條之義百首成數也卽有漏於百之外與冒於百之中  
者可與言而不言不可與言而言君其問諸簿書

臨晉縣志卷十五

選一

書選

溯自西河傳經司馬記史河汾文獻郁郁彬彬三晉著述  
復乎尚矣臨晉大邑箸書立說藏之名山者當不乏其人  
惜乎陵谷滄桑不惟其書不傳並書之名亦罕聞知王志  
曾無一語道及艾志雖有藝文撰著一篇而清代以上弗  
錄將何以闡前徽而詔後學乎茲查通志以求其舊採訪  
以增其新蓋亦不過什百之一耳且全書多未厲目名存

而書佚者尤多列其名而已不敢強為解題也

武德律十二卷 又式十四卷 令三十一卷 唐 裴寂撰

司空表聖文集十卷 唐 司空圖撰

司空表聖詩集十卷 唐 司空圖撰

一鳴集三十卷 唐 司空圖撰

詩品一卷 唐 司空圖撰

發燄錄一卷 宋 虞鄉司空輿撰 通志醫家類

貽溪集二十卷 金 虞鄉麻革撰

佩蘭集 明 王俊襟撰



臨晉縣志

明

邑人荆養喬撰

四書淺說補

清

邑人李世惠撰

鄰園詩集

清

邑人李世惠撰

慕適軒小草

清

邑人王恭先撰

老學菴集

清

邑人王恭先撰

詩餘

清

邑人王恭先撰

文鈔

清

邑人王恭先撰

初學詩鈔注

清

邑人王恭先撰

有學詩鈔注

清

邑人王恭先撰

臨晉縣志

清

邑人王恭先撰

用存堂稿一卷

清

邑人謝陳常撰

詩集四卷

清

邑人謝陳常撰

文集八卷

清

邑人謝陳常撰

葵書十六卷

清

邑人王桂撰

攻玉堂文集

清

邑人王桂撰

四書童子問正編續編旁譚

清

邑人王桂撰

四書燕說

清

邑人王桂撰

四書賦

清

邑人王桂撰

論語時評

清

邑人王桂撰

話磚錄

清

邑人王桂撰

代談錄

清

邑人王桂撰

識小錄

清

邑人王桂撰

性理吟

清

邑人王桂撰

性理字訓

清

邑人王桂撰

勸民俚言

清

邑人王桂撰

聞見錄一卷

清

邑人荆如岱撰

文集六卷

清

邑人謝功肅撰

詩集四卷

清邑人謝功肅撰

居易堂稿

清邑人姚縉撰

滋德堂稿

清邑人薛天相撰

學庸說略

清邑人王承宗撰

論語疑義摘問

清邑人王承宗撰

大傳說略

清邑人王承宗撰

周易疑問

清邑人王承宗撰

嘯崖吟稿

清邑人荆炳撰

學庸指迷

清邑人吉長清撰

三惜齋文稿

清

邑人王鳴皋撰

傳心錄

清

邑人王鳴皋撰

訟過齋叢稿

待刊

邑人許鑑觀撰

文牘彙存

邑人許鑑觀撰

愚如遺稿

待刊

邑人許祁蕙芬撰

世界讀史地圖

邑人姚守文撰

世界地理講義

邑人姚守文撰

中國地理講義

邑人姚守文撰

社會學綱要

邑人許振甲撰

經濟學原論 邑人許振甲撰

選二

文選

藝文之有關係者直錄於列傳中此史家之通例也志非史也宜稍變其例若名宦鄉賢諸錄但錄其事蹟而不載其文若古蹟記金石記有非文無以證明者則併記其文若雜記所收則又文雖可傳而無關於本邑事實茲篇所輯皆舊志所載而未附見於各記者選而錄之亦他日之史材也保存國粹者加之意哉

舊志載司空表聖詩文獨多今以全集通行故從略又如張玄素諫疏董太傅行狀則唐書韓集皆載之虞志亦載之今亦從略其他如呂涇野遊王官谷記等篇虞志已載者併從略

辯五代史闕文傳

宋王禹偁

王禹偁曰五代史闕文云圖字表聖自言蒲州人有俊才咸通中登進士第雅好爲文躁於進取頗自矜伐端士鄙之從事使府洎登朝驟歷清顯巢賊之亂車駕播遷圖有先人舊業在中條山極林泉之美圖自禮部員外郎避地

焉日以詩酒自娛屬天下板蕩士人多往依之互相推獎  
由是聲名藉甚昭宗反正以戶部侍郎召至京師圖既負  
才慢世謂已當爲宰輔時人惡之稍抑其銳圖憤憤謝病  
復歸中條與人疏不名官位但稱知非子又稱耐辱居士  
其所居在鎮貽溪之上結茅屋命曰休休亭嘗自爲記

云云

已上  
舊文

按圖河中虞鄉人少有文采爲鄉里所稱會王凝

自尙書郎出爲絳州刺史圖以文謁之大爲凝知入知制  
誥遷中書舍人知貢舉擢圖上第頃之凝出爲宜州觀察  
使辟圖爲從事既渡江御史府奏圖監察下詔追之圖感



凝知己之恩不忍輕離幕府滿百日不赴闕爲臺司所劾  
遂以本官分司俸之召拜禮部員外郎俄知制誥故集中  
有文曰戀恩稽命黜繫洛師於今十年方參綸閣此豈躁  
於進取者耶舊史不詳一至於此圖見唐政多僻知天下  
必亂卽棄官歸中條山尋以中書舍人召拜禮部戶部侍  
郎皆不起及昭宗播遷華下圖以密邇乘輿卽時奔問復  
歸還山故其詩曰多病形容五十三誰憐借笏趁朝參此  
豈有意於相位耶河東節度使王重榮請圖撰碑得絹數  
千疋圖置於虞鄉市中恣鄉人所取一日而盡是時盜賊

充斥獨不入王官谷河東士人依圖避難獲免者甚衆昭宗東遷又以兵部侍郎卽召至洛下爲柳燦傾阻一謝而退梁祖受禪以禮部尙書召辭以老病卒年八十餘又案梁室大臣乃至有如敬翔李振杜曉楊涉等皆唐朝舊族本以忠義立身重侯累將三百餘年一旦委質朱梁其甚者贊成弑逆圖以清直避世終身不仕梁祖故梁史拾圖小瑕以泯大節者良有以夫柳燦爲相臣僚多被放逐圖爲監察御史尤加畏慎昭宗郊禮畢上章懇乞致仕曰察臣本意非爲官榮可驗衰羸庶全名節上特賜歸山其詔

略曰既養高以傲世類移山以釣名心惟樂於湫流仕非  
顯於貪祿匪夷匪惠特忘反正之朝載省載思當狗逐棲  
之志宜放歸中條山詔辭乃燦之文也時多以四皓二疏  
譽之惟僧虛中云道裝汀鶴識春醉野人持言其操履檢  
身非傲世者也又云有時看御札特地掛朝衣言其尊戴  
存誠非邀君也

故規措使陳君墓誌銘

金元好問

君諱仲謙字守卿姓陳氏其先京兆大族唐末避巢賊亂  
遷眉州之青神宋天聖中居四世矣太常少卿贈刑部尙

書公弼始起家遷洛陽東坡爲其季子慥作家傳述其風節備矣刑部生京東轉運使忱忱生文林郎慈州司使曹揮遂爲臨晉人揮生儒林郎灑灑生克基登天德三年進士第仕爲國子監丞卽君之考也君幼穎悟監丞君授之賦學卽有聲同輩中年未二十繼遭家難不能卒業乃以父廕繫供奉班自美原四厯權酷用課最遷山東監使司管勾遭眞祐癸酉之兵弁還鄉里已而南渡河愛永甯山水之勝遂欲終隱朝議以危急之際士子多避難吏部下所在凡終更踰兩季不赴選調者以瞻望畏退受罰君不

獲已赴京換三白渠規措使自陝右受兵水曹之官廢渠  
路淤墊故入不能平歲之半監卒係空籍坐糜廩食而已  
到官白於行臺得用便宜從事行視塞門經流復通力剗  
奸弊豪右不得專輒公私咸賴其利村落間作佛事有爲  
君薦福者俄用薦書辟京城監支納君自少日置家事不  
問旣老尤欲翛然於塵垢之外米鹽簿書閉目不願視未  
幾謝病去三縣大夫士所聚賈吏部損之趙漕使慶之麻  
鳳翔平甫劉鄧州光甫日有觴詠之樂猗氏舅鄉女兄辛  
敬之定襄趙宜之邑子和獻之皆高人勝士君從容其間

者十餘年洛西盛集此一時也正大九年壬辰夏六月不幸遘疾終於長子賡之陝州鹽部官舍得年六十有一實二十有九日也積官昭勇大將軍驍騎尉穎川郡伯食邑七百戶娶同縣賈氏大定中進士河東承恕之女封穎川郡君後君二年卒子男五人賡河東山西道行中書省參議庾平陽路提舉學校廩今朝近侍局奉御庠蚤卒膺東平路勸農使女二人皆早卒男孫五人元凱元義元忠元英元振女孫五人幼在室諸孫於辛丑年二月初三日卜吉舉君之柩葬於縣北原疑山之先塋夫人附焉禮也君

天性冲粹與物無競材技超絕而恂恂退讓似不能者與人交雖愚幼且賤未見有惰容在三白時業戶以瓜葉菜茹爲餽者亦以溫言却之其審於持已又如此幼工分穎眞草之書文人以爲竹谿黨承之流嗜讀書寒暑饑渴不以廢至於陰陽星緯方技之學無不淹貫晚年留意內典遂不如葦寫華嚴經數千萬言細書纍纍如以一髮貫羣蟻也陳氏太常公後宦學者皆有名簡齋先生去非遂參大政特天會以後仕途乃連蹇耳蓋金朝士子盡與唐宋異衣冠盛德之後雖有文武全才碌碌常不調有終身不

離筦庫者故有志之士抱利器而無所試至以輕去遠引  
爲高如君者是也使之乘時遇合少行其志豈廟堂諸人  
以薦紳先生自名者所能萬一哉君之不樂仕進必有知  
其微旨者好問不敏辱從君遊又與君諸子有連尙記竹  
閣觀君書雷內翰寺記時筆力清勁而有漢石經餘韻以  
心畫卜之知君之世不可量矣賢弟昆以墓銘見徵敢以  
一二知君者論次之其銘曰仕漫焉而不利謀藝焉而不  
知夸文雅從容悃悞無華尙友古人安丘壑爲榮華樂我  
所志然所得亦多者筆盤經石之不磨藹然粹溫見於行



問卜陳宗其未涯南渡崩奔猿鶴蟲沙獨君子孫蔚爲大  
家此所謂公侯之世終必復者將必有以啓之耶

按此文遺山集中不載寰宇訪碑錄有碑名而無文

了了堂贊孤雲子純夫

元賈履信

氣飄飄而罕及貌堂堂而寡儔立功名於弱冠如鷗鷺以  
橫秋棄浮雲之富貴遂勇退於黃流玄門妙理乃訪乃求  
名山勝地以邀以遊得王官之佳處卜歸隱之菟裘栽松  
種竹事事清幽峯奇水秀無異瀛洲樂閑中之雅趣旣終  
老於林邱鑿山而葬霞歛雲收俯仰天地浩然無羞我知

純夫茲堂之了了竊以比表聖故亭之休休

### 重脩儒學記

明 呂 柟  
涇野

慶陽丁君來宰臨晉政餘進諸生率勉淬勵以學宮圯且隘恐不足作士氣迺謀諸寮案師生鄉士大夫改作焉學後空地久棄坑塹囑教諭李孟賢訓導張珥督平之遂移退省堂於此東西各增號房十五楹分爲五聯後官廨改退省堂址爲明倫堂兩齋各增爲五楹益以簷廊碑亭二在明倫堂前改明倫堂址爲大成殿東西兩廡聖賢像移置重飾神廚在東廡北倉庫在西廡北改大成殿址爲戟

門舊戟門址爲樛星門外建坊二座儒學門三楹內禮門  
義路巡按萊陽王公士英潛江初公啓昭相繼發贖金以  
助經始於嘉靖癸未秋落成於乙酉春諸士子咸感德欲  
識不忘乃問記於柁嗚呼士子之學與不學由上之人振  
作何如也丁君往年遣其子與邑之二三子從學於予今  
有此舉其志當不小諸士子其無負乎哉吾聞之君子有  
三患未之聞患弗能聞也旣聞之患弗能學也旣學之患  
弗能行也君子有五恥居其位無其言君子恥之有其言  
無其行君子恥之旣得之而又失之君子恥之地有餘而

民不足君子恥之衆寡均而倍焉君子恥之諸士子之爲學也能奉此三患存此五恥於以善俗於以康國以爲士焉其丁君之志乎苟徒借爲出身之階假爲媒祿之計行與言違名與實浮寧不有愧於斯建耶諸士子不見張玄素乎唐太宗治洛陽宮乃上書諫止魏徵歎其有回天之力不見司空圖乎拜諫議大夫以不從僭逆高臥王官時盜賊不入其谷茲二子者皆邑人也其學術事業可與日月爭光况東有傅巖西有伯夷北有王通相去不過百里諸士子倘有采於斯言則茲學也當與傅巖首陽龍門並

鳴於世矣諸士子其無負乎哉

又

僉事 李 濂

臨晉者秦築壘以臨晉疆之邑也裔陝而阻河壤狹而道僻觀風者輪轍鮮及焉邑有學學有廟創自於洪武修於景泰歲久傾圮風雨穿漏非所以妥神而育才也嘉靖癸未夏五月巡按山西監察御史王公冒暑而來茲邑晨興詣學謁廟憮然曰語有之匪廟曷興匪學曷淑夫瞻依觀感之謂興化民成俗之謂淑是故王者建國軍民教學爲先立學以儲俊才爲一世用也立廟以祀聖人爲萬世師

也今廟學敝矣興焉淑焉非吾黨之責乎乃步營盡度下  
檄召工卜辰始事發贖若干以庇財用知縣丁守中奉令  
惟謹拓隘易堅夷塹徙礎殿廡堂廨齋庖庫咸新焉五  
越月而告成事公命濂爲記濂告多士曰夫聖遠而教衰  
乎夫世漓而道晦乎夫俗降而士靡乎游息作養本於校  
景行嚮往切乎廟啓發引掖由乎師薰仁靡善賴乎友肄  
業稽討存乎籍篤志力行成乎德是故遊校趨廟儒之方  
也隆師親友士之常也博籍懋德教之良也克興克淑道  
之光也故曰立天下之準者莫尙乎鵠鳴天下之務者莫

尚乎學爲天下之宗者莫尚乎聖人遊斯者其互勉之  
哉夫廟學成而余諄諄以是告者期多士也述公之意也  
公名秀字士英萊陽人甲戌進士巡按是邦無僻弗至窮  
谷黃耆不識使輶者聞其來皆扶杖往迓詢瘼沛澤晉人  
胥悅蓋嘗弈臯陶之祠封祁奚之墓復杵臼之廟表羊舌  
之里在臨晉則修廟學如此云

又

邑人王光字

臨晉古邑也庠序之設厥來逖矣嘉靖癸未巡按萊陽王  
公按部至是病其規制之湫隘也命邑侯慶陽丁君仲本

拓而廣之於是氣勢恢弘棟宇聿新而人文之不振胥此  
矣抑孰知不六十年而有如今日之變遷也哉迺者己卯  
歲季冬十二日夜秦晉地大震凡邑之廳事廨舍公館城  
垣瞬息傾圮而廟學爲甚覆而死者幾千人雖賢愚貴賤  
弗分也噫此豈非曠世未覲之大變也歟先是觀風者蒞  
臨視學構席舍而居之至於風日罔蔽瓦礫盈前除之而  
已修葺之弗遑也歲在丁巳我邑侯龍岡李公以名進士  
奉命蒞止卽百謁廟憮然興歎曰學校風化之所自出土  
類之所甄陶而顧就敝如此斯固吾責也遂謀及寮佐判



簿張君自成而亟爲之辦集攄材凝土計費庀徒工出於  
募不徵調於夫家財出於勸不支費於公帑特簡謹厚者  
掌之易材之良程工之能踰數月迄用告成中爲先師殿  
翼以兩廡前爲戟門又前爲櫺星門又前爲坊表以左右  
之東爲啓聖祠殿後爲明倫堂翼以日新時習兩齋而敬  
一亭賢宦祠在櫺星門內之東西各樹扁以別之而宰牲  
所以附焉堂後及兩旁爲掌教司訓宅所構凡若干楹井  
井煥煥卓有改觀雖簠簋籩豆帷幃幄閣之類胥飾焉較  
之前令之所增飾又天淵迥不侔矣於戲我公之用心不

亦甚盛矣哉夫觀世以易化者聖也矯時以振俗者賢也  
物必有敝承敝者復其盛世必有變達變者反其常公之  
賢真過人遠矣洪惟我朝以人文化成天下士咸知業乎  
其學猶百工之執藝以需用也有學焉以爲藏修之地猶  
居百工於肆俾專業也而提調所司又監臨日督召之者  
也曾謂膺其責者坐視其肆之傾圮而漫不爲之所也哉  
但世俗吏率視爲迂緩或有及之者祇以粉飾塞責噫敝  
也久矣茲者舉頽廢於一旦而復甄勸以速其化師模士  
氣咸顛顛然維新猶百工得居肆之專加日督之勤寧不

思所以自成若是乎而吾之所有事者體用一原廣大悉備初非艱避虛幻支離瑣屑者之爲蘊諸衷則足以定性潤諸身則足以平氣達之於辭則足以立言布之於交際則足以合禮刑之於家則足以薰善推之於鄉則足以美俗措之而國而天下則足以弘化庇民施諸後世則足以爲階而垂休光於有永矣是之謂實學而生人所不可一日缺焉者苟但於斂巍科躡穹秩已也則易於腐壞漸盡是亦淫巧苦惡之工耳將焉用之今日建學以風士者固若是哉夫宮牆新則觀望起宗廟飾則恭敬生吾見諸士

於是乎惕惕而思肅肅而奮者夫豈容已哉

荆公尹臨胸德政碑

州即荆

學翰林馮琦

自古稱去後思者無如汜鄉侯何武武在漢吏中摘發不  
及廣漢治辦不如敞所居無赫赫名當其既久摘發治辦  
者皆與其人俱往而武獨見思蓋世所稱赫赫者能使令  
必行禁必止不能使人思能使人思者必其不爲赫赫者  
也譬之飄風驟雨挾怒霆而下非不震蕩一時然入地僅  
及膚而止震蕩之過或遂有所摧折若夫不鳴條不破塊  
優渥霑足物受其滋以華以實而不知所以然蓋吏道亦

猶此矣荆公蒞敝邑五年其善政墾荒蕪撫流移清編審  
平徵收省勾攝雪冤獄清丈量積儲侍興學校表貞烈未  
能更僕數然大略立法務簡持法務平卽窮鄉幽壑欲陳  
說疾苦者皆得詣令無所隔闕故朝所措注暮及百姓百  
姓於公始至驩然道之已習而安之旣去而悵然思念之  
更十餘年如一日也以質之汜鄉侯復何愧耶蓋今天下  
側目重足所患苦者獨在赫赫吏耳彼日凜凜焉恐其名  
譽不彰官不達取數事條次之諂納其說以合上官而又  
刻期以責其效慘礪以速其期何暇爲百姓計久遠故庭

中稱治野則否上官稱賢民則否世所稱赫赫者大都若是矣守令職在牧養法當如慈父母於嬰兒安得所謂赫赫者而稱之荆公當去之日如始至之日既去之日逾於在之日於世所稱赫赫者蓋能爲之而能不爲也史稱何武仁厚至其爲刺史行部中屬吏有罪又應時舉奏故當爲郡吏時識者以爲有宰相器公自爲令爲御史治邑按部皆與武一轍而其氣深廣萬傾不撓亦復似之蓋士必安凝如山淳泓如淵然後足以享盛名而載重任若夫輕見其奇一覽都盡卽赫赫無足數也夫赫赫爲政者怨府

也赫赫爲名者毀媒也惟寬大長者乃可以久如公者眞其人哉予故列次其行事以附於漢循吏之後而併以誡夫後世之爲赫赫者

### 雙烈井碑記

清石博訓導

甲申之變姚門胡氏李氏死於井有司上其事撫軍表厥宅里名井雙烈胡廩生姚在陞妻李其媳也庠生翼宸妻余惟節烈之美非不備乎德者所能出也方闖氛颺蕩深閨避影之人一旦塵奔露竄冀倖生全遭攫搏則弱質不復自主因之破腦刳腸投崖蹈火揆之旅舍引臂輒自斷

腕之義目爲不暝矣而胡李度造次顛沛中必無自全之術姑語媳曰難將及與辱身無寧捐生不愧天壤也授乳婦以襁褓自溺於井媳趨繼之寇去家人縋尸出面如生村男女皆羅拜嗚呼死得死所死且不死矣且夫兩烈婦殺身成仁舍生取義夫人而知之而先事見幾違衆不惑智之大者所出也夫人而知之乎視冥冥如歸棄呱呱不恤勇之大者所出也夫人而知之乎余故於其死不以慷慨引決盡之而曰非不備乎德者所能出也抑釋名井清也泉之清潔者也宇林井以不變更爲義易曰改邑不改



井烈婦何不可死而死於井固有所取義乎後之飲斯井者顧井所由名無不思潔其行義安在兩女子死事不與百世之澤同流芳不竭哉

遊五姓湖記

清牛運震

太守周侯濬湖之三年余與浙東胡稚威及周侯永濟萬泉二明府泛舟於湖是湖匯永臨虞三邑之交南浸中條北接桑泉東受姚暹渠鴨子池諸水西抵趙伊鎮輸於涑水周環六七十里五老諸峯倒影其中孤山峨嵒岡遠空涵翠復映帶之十月二日余與張畢二明府先後至湖已

而周侯自虞鄉却來輿迎胡君達湖上當是時漁人篙工  
及湖山農民百數十人咸艤舟以待明日登舟由南岸放  
乎中流綠嵐微暈紅林未脫風平煙淨湖光瀲灩白雲橫  
抹橋影參差已而扣舷載詠舉酒相屬高譙轉清極望曠  
渺樂可知己漁人農父有歌於舟中者隸卒按拍吹笛和  
之漁之柔流而施罟者罟聲與歌相答也周侯推酒饌以  
饜耕牧之民俯仰雲水四顧洲原爲說鄉土山川風景之  
勝晴雨桑麻伏臘賽酺之樂移舟促棹酒酣耳熱雜飲杯  
觴高索果栗若不知有太守者鳧雁懽聲林木交舞日暮

影轉夷猶不厭夫守土不可以遊覽爲事彼其部領文奏  
一日之翫則廢之矣矧其朱幡阜蓋鹵簿騶騎於山水之  
趣何有哉謝靈運泛麻源山簡醉高陽池吾意其掾吏猶  
苦之爲之民者顧安所得共焉如使僕僕鑿山谷供帳具  
則民不利有風雅之使君可知也至若逸人畸士往往幅  
巾竹杖喜自放於山巔水湄之外一遇達官畫舸鼓吹則  
有款乃一聲棹煙港荻浦而去耳夫又安從致之然則周  
侯今日之遊其何以爲此樂也昔湖當盛時環陂皆樓閣  
臺館桃李霞綺酒旗歌管掩映簇集湖之淤且涸者今百

餘年周侯疏涑水併湖濬之今之清波灩澦彌望浩淼者  
周侯力也淺有菰蒲深有葭葦魚蝦之產歲千萬石湖之  
民攜而弋其利者倍禾稼之入扶老艾抱孩穉熙熙於山  
色湖光之中者朝夕徧焉乃今周侯得一遊遊而山農澤  
疇益得有其樂然則湖自周侯始湖之遊亦自周侯始雖  
謂周侯治蒲如斯遊可也

### 五姓湖記

蒲郡太守 周景柱

湖當臨虞間環迴數十里古所謂張揚池也五姓不知何  
以稱或曰昔湖有五姓漁者因以名余少讀漢書曹參韓

信攻魏將孫林邀於東張未識其地後讀水經注始知爲  
涑川所經因考地志湖接桑泉帶剝首面中條空浮翠涵  
景象多有往往想見其處乾隆壬申自甯武移守蒲以事  
往臨晉得至湖所湖人云前時環陂皆樓閣亭館雜樹桃  
李丹綺照耀酒帘歌箏遊者簇集波光渺瀾吞漾雲日煙  
艇往來泛狎鷗鷺光景良勝今湖就涸者久佳賞麗矚曩  
昔殊異惜予不及見然漪吹練灤猶足悅心目曠志趣蓋  
山西諸郡多叢山廣原陂澤川池所在鮮少一日得此江  
鄉之思悠然自生至明年水之涸者復生又明年方有事

涑姚之渠遂并湖濬之浩淼彌望浮碧無際湖中有堤橋  
影參差樹色映掩行人往來儼若圖畫湖先多魚旣涸故  
民失網罟利及是水日盈魚愈衆癸酉歲辰師棹入者舟  
數十比甲戌已百餘今年乙亥且二百蓋合臨虞永三邑  
之人皆往焉四方諸郡或先賦以金而後償魚計其利歲  
可數萬夫陂毀鴻卻黃鵠託歌練湖旣復懽傳丹陽蓋民  
之畏奪其資而喜得其獲也左傳言衛文公元年三十乘  
季年乃三百乘今湖魚之美有似於此予又以喜其利之  
無窮若夫移畫舫泛清冷擘蒲荷之芬芳狎鳧鴈之翔泳

太守得以官政暇餘與邦人相狎其際猶未也

復涑姚二渠記

胡天游 稚威

蒲晉之坤河帶如玦川在州城北汾南涑涑自唐都督薛萬徹導水夏縣至臨晉西委張澤入於河解之平陸泉出橫嶺澗合溪赴會流以盛隋都水姚暹渠引焉至蒲虞鄉縣澤首受亦西入於河然暹所引本北魏時永豐渠舊而酈善長謂涑水西逕郇瑕又西南逕張揚城屬於陂則非萬徹暹所始營唯二渠源潰山谷悍挾泥沙時時壅不循其理久益爲變暹徹所以條其攸歸必使之復去害致利

以予其民宜著史書稱名勿絕渠自兩人後開塞幾變近廢不治療甚而張澤者卽善長書涑所屬陂今以爲湖變其名五姓湖故瀦渠郵以輸河涸數十載鯁前時入河道凡二渠積闕流當就湖者或不能至若夏秋會甚風淮雨嘯漲鼓怒涑衝暹渠力併壯決敗解鹽池蕩廬稼撼郭邑因颺注湖莫有洩容游波踔騰四齧原陸蒲解之人用爲困河東兵備道喬公蒞蒲三年政理孔成邦俗大和前甯武太守周侯用循賢移知蒲府事相與謀吾民幸保生聚樂安業今數縣氓庶釋咨畢安猶若未者且解池繫國賦



鉅唯水是病却蓄底輯使無濫沈川瀆順性歲種時慶經  
務之要莫急且先迺召父老告以渠河興罷孰利咸曰苟  
導復之利世世於是計涑與暹渠左右夫家其田漑潤得  
及者率戶役焉其非蒲所治而統於河東爲解州以畀其  
守其在蒲縣四曰猗氏臨晉虞鄉永濟周侯董其令分主  
之以爲禹治水施先下流湖渠同時迺畚迺鑿迺疏迺穿  
乾隆甲戌春正月水功是興逮四月成自解安邑屬蒲永  
濟三百餘里循渠樹防翼翼傑傑式砥式遏而邸家營者  
介虞鄉猗氏勢尤南庠異時涑橫擣入里爲巨浸狂溜勇

淘地益底深岸高下絕懸五六丈崩口不可塞合周侯謂  
此涑要害如軍陳攻守必爭險勝出俸錢買其傍田盡土  
實之奪其凶門卒杜服上爲其堤崇築加仞厚固彌鞏責  
官吏以時衛於是憤帖鬱宣潦縮其暴乎野者壤出其淪  
於墊者昔若食得噎茲委壑如紡土燥厥穉復於田耕塗  
懼里歌忘其恐慙方役之興公及周侯躬巡渠所勞其人  
勿怠日夕旣訖徧酒肉賚賜慰遣焉悅以先民佚道使衆  
君子於事有如此今夫去疾病而復於壯者之爲復國地  
失而復克取有之之謂復城郭道路陂澤隄渠其旣廢而

治興焉之謂復修其圯功攘其患用其利猶起膏肓奮武  
烈均乎大庸予診斯謀美河東公功太守侯之勞烈同德  
協慮康享民視暹萬徹所爲猶有尙思揚其光嘉昭無休  
且告繼爲政者師循之亦克保奠以終永厥績毋隳

### 臨晉辨

邑人王恭先

舊志謂秦築高壘以臨晉國卽今之臨晉非也考班氏注  
左馮翊臨晉縣故大荔也秦取之更名應劭曰以臨晉水  
故名臣瓚曰晉水在河之東此縣在河之西不得云臨晉  
水也舊說秦築高壘以臨晉國故曰臨晉章懷注曰臨晉

故城在今同州朝邑縣西南斯言當矣史淮陰侯傳魏王  
豹盛兵蒲坡塞臨晉師古曰臨晉在河之西濱東臨晉境  
魏世家文侯十六年伐秦築臨晉正義曰在同州澄城縣  
界前曹參傳參以中尉從漢王出臨晉關伍被傳淮南王  
曰先要成皋之口塞轅轅伊闕之道守武關然此北尙有  
臨晉關地理通釋云卽蒲津關在臨晉縣由諸說觀之史  
記所謂塞臨晉者塞對河之臨晉關耳小司馬不諳地形  
乃曰臨晉縣名在河東岸對舊關不知漢時河東止有解  
縣而無臨晉此說一誤後人沿爲口實一統志於蒲州臨

晉遂曰秦築高壘以臨晉國故名夫築壘臨晉本無所出獨見於臣瓚之注漢書既引以實馮翊不知諸儒何見欲引入河東也卽曰河曲可入王官可俘而高壘何不可築但河東未聞一時有兩臨晉譌以傳譌建安馮智舒因之作質實編以注朱子綱目質而不實貽誤尤甚予固不得不爲之辨

### 臨晉說

邑令王正茂

愚按文獻通考云晉州古堯舜之都所謂平陽也春秋時屬晉後魏爲平陽郡兼置唐州後改爲晉州隋置臨汾郡

唐爲晉或爲平陽屬河東道則今之蒲州與古平陽相系屬者也平陽爲晉則蒲亦晉地臨晉之名其以此歟又括地志云平陽河水一名晉水而郡之西南亦有晉水王恭先云平陽之晉水難以遙臨則從前蒲屬平陽又何以遙制歟以臨晉州晉水爲臨晉似亦可通且虞鄉西三十里有晉陽故城則此地已明明在晉之陽矣何不可臨之有必專指臨虞鄉晉城得毋隘乎

### 葵書序

曾國藩  
文正公

葵書者河東臨晉王桂子山之所爲也臨晉古桑泉地故

自署桑泉布衣初桂父僑居河南鄧州桂生五歲隨父南遷至五十而北歸中間處鄧州久甚於禮部法凡寓貫不如令不得與於州府有司之試桂亦自無意於當世之科第終歲授徒麤糲裁給講授之餘了無他營日夜討論於其所謂葵書也者以爲葵一微物睠睠向日匹夫報國義亦如之由是自厚生正德之常經整軍勤王之遠略天地否泰消息之微經史諸子雜家之奧凡有當於人心利於民用措於天下國家而無患者靡不載記爲綱四目十六目中之目百有六十每目或數條或十數條大都無慮千

八九百條矣其文體無所規模句鍛而字鍊之徵引故實博極羣書雖其門弟子不能盡以解說於是倣古人經傳各行之例別爲葵書外編一一徵其來處而鄧有劉琦楚珍者又爲疏證然後顯幽剖奇昭晰可讀零金碎玉往往而逢焉桂生雍正乾隆之時我聖清全盛之時也棫樸作人之化涵育百餘年矣二三元老如高安朱公西林鄂公之儔皆以推賢薦士爲務純皇帝益崇儒術特開鴻博之科以網羅遺逸巖穴之士響然畢臻或起白衣數歲而躋公卿其後又有經學之科有召試之典山澤幽隱求之不



可謂不勤搜採不可謂不徧而尙有布衣終老如桂其人者後世求士之道萬不如乾隆之初之誠且備則夫士之好學有道而不得職而因辱以死者豈少也哉鄧爲州在萬山之中冠蓋文人之所不及而桂之閔寂又無相知有氣力者爲之應援自此書成後越十餘年而國家輯四庫書又十餘年而山西續修通志皆不齒列其間斯又持文柄有採訪之責者之恥也國藩受讀初畢因稍爲論定後之君子有能重刊此書則合外編與本書而一之釐正其節目而芟取其要蓋不無可觀亦以慰遯世獨行之士云

臨晉縣志卷之三  
來復渠記

邑令 錢官俊

臨晉城北水道由文星台下流繞齊家莊與西流之水交  
匯於城之東南隅此古道也居民導引灌田斜飛而東學  
博石某復爲疏浚使折而南縣志稱其有功於臨不小戊  
辰之秋余捧檄庖代斯邑人有以水之禍福告余曰自石  
學博復水古道而邑之登賢書者不知凡幾今古道重塞  
而齊家莊民胡姓藉口水害復使東流訟延不結十餘年  
來科名寂寂然職是故耶余曰不然水之禍福堪輿家能  
言之若科名之盛衰氣運維繫之豈盡關乎風脈哉夫修

舉廢墜有司之責凡事可興則興之可復則復之何惑乎  
禍福利害之說哉卽往驗之鳩工舉畚鍤不日而渠成人  
咸相慶曰渠復矣無何齊家莊民復藉口水害上控檄飭  
榮河戴公勘訊未旣訟又延初胡姓上控捏齊姓名而齊  
不知至是內訌來訴得其情始知胡姓之欲東流者爲繞  
其陰地也一訊服誣迺以居民修輯鄉里議新道高出古  
道二尺許水小獨流古道水大分流新道來請於予時三  
日大雨而水自北來仍繞齊家莊而南而東一往暢流並  
不爲害乃知獨流古道者常其分流新道者暫遂允如所

請而案以結嗚呼此構訟數十年余以不畏難而一意徑行重復古道雖曰人事豈非天哉易曰敦復无祇悔又曰七日來復復之爲義大矣哉因名之曰來復渠所以示敦本復古之意也

### 重修孔子廟暨崇聖祠記

知事

俞家驥

民國九年夏家驥移篆是邑遇來復日莅孔廟講演循省例也入廟見殿廡規制崇閔各界麇集大成殿聽講殿以外敗磚頽瓦觸目皆是兩廡及鄉賢名宦兩祠均隔作住室神位多顛倒遺失戟門五楹皆蔽以蘆葦中設鍋竈汗

穢狼藉不堪。唐目詢諸士紳，則慨然曰：自政變後，防軍絡繹，城無隙地，多駐紮廟中，故致此也。余既別議置防軍駐紮處，乃將戟門五楹，添建門牕，闕作自省堂，爲來復日講演之所。殿廡泮池各祠牌坊，一律修理。並於櫺星門外添築甬路兩道，工既畢，次年乃更議脩崇聖祠。祠在孔子廟旁，改革後爲第一高小校，劃作飯廳，神位雖在，久同虛設。因將原有正殿三間拆去，移蓋倉道巷東首，並添建圍牆。大門照壁規模宏敞，所需經費或呈准動用舊存罰鍰，或商諸士紳，在賑餘項下開支。民不知勞而殿宇重新，今之

在上者慨世道之凌夷而人心之囂競欲宣明聖教以挽未倒之狂瀾夫尊聖者尊以心也惟賢者能因心以搆象而常人必覩象而生心今兩廟旣成俾凡來崇拜園聽者皆知尊其所尊所以引伸其仁孝誠敬之心也仁孝誠敬聖人之所以存心而教人者也使後起新進之士觀感興起心聖人之心因以道聖人之道優而飫之漸而漬之其所益於世道人心者至非淺尠豈特興土木繪丹青以塗飾夫外觀而已哉

重脩縣城記

前人

臨晉之城小完而固然多年來亦屢殘破矣民國六年戴可風雖擇要補修而保護無人益之九年冬之地震十年夏之水災已脩者缺未脩者圯余來宰斯土見斷磚頽垣顧念臨毗秦界自改革後五年中兵燹兩經地之重要城之關繫怒焉憂之爰商諸士紳鳩工庀材凡門樓廟宇雉堞花牆圯者復之缺者補之是役也費銀三百五十元呈明由賑餘項下撥用不動庫帑不取民財工堅而費省閱兩月而告成規畫勘估爲本署委員李桂林董其事者則邑紳王宦章許毓梓張青選三君工竣集同僚士紳而語

之曰崇垣危堞城之有形者也協力同心城之無形者也  
故詩曰赳赳武夫公侯干城又曰懷德維寧宗子維城夫  
防意曰如城衆志則成城今之所脩者城之有形者也其  
無形者願與諸君共勉之則所以脩築斯城之工乃完而  
所以保守斯城之形永固吾儕所自責爲保障爲屏藩者  
豈僅區區一城也哉旣以語諸君并誌之以告後之來者

雁門道尹許海瀾墓誌銘

晉城

郭象升

清光緒庚子余與許公海瀾同肄業太原令德堂未相識  
也時院生所學不同各自爲曹其以理學自標者尤矜重



不輕與人往來公是時亦有理學名然獨倜儻多非常策畫交友間傳稱其才以爲與坐談誠敬者異也甲辰春河東道吳匡聘余長河東中學公長河東師範學校余不赴然輾轉教授所至訖無成就而公任事六年名聲砰隱在晉之西南民國肇建有言上黨當分設一道者或曰誰堪此選余曰宜莫如許君矣永濟李樹墀聞之以爲軍府信有此議也飛書寄公並及余推轂狀公覆書曰此讐言耳然郭君意良可感公與余相聞由是始也又後二年乃相見於太原公所經涉皆極天下之盤錯而嶢然不汙一無

車礙每相見談論鋒起遂晷不得罷有意乎曾文正閣文  
介之爲人也旋出爲雁門道尹民國九年四月余過大同  
謁公公留飲酒次余調之曰向以道尹待公公果道尹邪  
公曰有是乎余忘之矣雖然子惡知道尹之難余方思不  
爲道尹而不得也嗚呼自此一見余遂與公已矣豈不悲  
哉公諱鑑觀海瀾其字世居臨晉之許家莊曾祖正恭祖  
德常本生祖德全父昌貞妣李氏生丈夫子三人公其長  
也家世清貧薄田數畝硯陘穀畜不足以贍八口公出就  
外傅穎敏兼人每歸省則佐諸母掘麥根供炊搬柴運水

之事無不攘臂其間入夜挑鐙洛誦必盡補一日曠課而後已會樂平李菊圃先生謝貴州撫部歸主講晉陽書院其學以洛閩爲宗以刻苦自厲爲入手方法昌貞公聞其風而說之遣公負笈從學李先生大喜錄置門下稱高第弟子已而孝感屠梅君先生來主令德堂公復從受業爲都講屠先生亦好宋儒書其教士略仿胡安定遺法今與古並治身與世交急公益聞所不聞其後建樹卓然蓋得於二先生之學爲多光緒二十九年鄉試公中式舉人時闡場遂西安屠先生方主關中書院因復招公廣續舊業

所得益遂書院旋改學堂當事者拔公充任教習舊日同學皆退就弟子之列帖然無異辭論者以爲難於是新政初興尤重教育河東道吳匡以書禮聘公歸晉任初級師範學堂監督事屬創舉人情不能無異同公一持以誠前後六年學生至四百餘人建築新舊各式堂舍百餘間籌添學校底款至八千兩其教法一本夙昔實踐所得力闢靡衣媮食之習崇實用戒玄遠衆志棣通譽髦蒸進論學務者以河東爲圭臬焉河東故鹽區也公少卽留意鹽法利病時時搯腕悲憤欲出其所學有所更張至是建議於

黃河下流試行小火輪船以利運道聘廣東船師來晉踏勘公親冒風雪歷龍門底柱之險手足皸瘃不以爲勞終以造端閔大不克舉行然公之廁身鹽政由是始矣其後出入經營十餘年再起再仆卒以所規畫見之實行爲河東奠百年之局云宣統建元被選爲諮議局議員建議統一河東坐商案事未及行而國事已變公歸自太原創設河東全屬紳商事務總所力持阡危當是時張士秀李鳳鳴借陝軍攻運城下之以便宜推張長民政李主兵事傾側擾攘之中人情皇皇一夕數驚而清總兵謝有功負固

平陽與張李相持亦指日及公公不憚也既有功委兵去河東事稍定公脫身歸臨晉閉門課子身與世若兩不相收河東在事諸君皆公久故函電紛馳以苦語要公出山不得已至運城喋血之餘公私掃地而鹽署檔冊已蕩然一空公生平以精通鹽務自許在事者亦以此推公遂剗設河東臨時鹽政處以公爲總理舉凡釐定稅則疏通運道裁減陋規辜權欠課諸端皆夜以繼日百方匡飭臥不解帶者兩月流允盡汰捐瘠大蘇鹽池地形東高西下夏秋霖潦積水汪洋無際行者裹足池內東灣南岸一帶年

產新鹽不得繞越以出東西中三禁門存鹽山積無過問者引地坐商折閱相繼公相度形勢就南近牆稍東穿墻垣別開一門名之曰南禁門池內東南各坐商始慶更生蓋前此非無計及此者然而賄不及則事不行手把牢盆者抗敝巧法固不肯洗手以從事也民國二年天下事大定新運使至公卽日舉冊籍送交主者百端鈎較無一錢不明白者咋舌相顧以爲非意所料也閱明年新稅則頒行前後兩運使延公爲顧問虛心聽納惟公意所便摩研編削輯爲成書於是票式倉案運法莫不變通盡利斟酌若

畫一計公一生實與鹽政相終始至是生平抱負約略見之施行而精力亦由是耗竭矣民國四年冬公以事至太原當道留辦官書局已而五台閣公招公入幕贊襄機務閣公宿耳公名公亦素仰閣公忠勤體國願爲盡死兩奉特委馳赴河東一以招撫軍隊一以清理錢商如器置地妥帖不頗流言恐獨譚笑處之遂充清查財政審核處處長校定科比撥煩如禮民國七年五月委署大同縣知事至卽兼護雁門道道尹旋解大同縣篆專任道尹自是鞅掌五年遂以身殉其職夫天下之官莫樂於巡道以其位



尊而責輕也而山西自改革以來一切破崖岸爲之閻公  
既夙興夜寐艱苦卓絕以爲僚屬倡猗胥老吏無得便文  
自營苞苴筐篋之私一掃刮絕百里之宰莫不家諭戶說  
以聽斷爲後化導爲先公少卽攻苦食淡恥於舒緩養名  
至是承閻公之意竭力馳驅蓋昔之人以地方按堵卽署  
上考其在吾晉今日之政固不以是爲止境也雖然公之  
死豈死於食少事煩哉蓋其志尙有不得盡行者而鬱鬱  
以至於此也莊生不云乎智士無思慮之變則不樂察士  
無淩誅之事則不樂吾蓋爲古今來役役於功名之途者

悲也公血誠過人篤於倫誼母喪咯血毀幾滅性嘗刻其私印曰不敢惜力曰此身與世共之捐金創設本村小學又以千金舉辦本邑志書方規爲祖祠義田諸事未及舉而病作臨終以屬公子振甲語不及他公之病也就醫太原閣公以接替乏材不允解任而勸公安心調理無以官事縈心公亦稍究佛理時取空寂之說自寬然聞時世有不可於意者輒輾轉不寧雁門公事終亦不能屏閣不問病遂不可爲矣民國十一年十二月二十三日卽夏歷十一月月初六日申時卒於太原旅次距生清同治十二年五

月十七日寅時得壽五十前夫人呂無所出繼夫人薛生子三長振甲卒業於北京大學哲學科得文學士位出游東瀛歸充山西督軍公署祕書兼大學校法政學校教員次應甲次瀛甲皆肄業學校振甲述公行實萬餘言事晰文奇人子之能顯揚其親者世尠倫比卜以民國十二年夏厯二月二十四日葬公於代村上堡祖塋以余爲公生平道義之交又嘗過以文字相推泣請爲銘余維誌銘義法勢難多書他日考公志業固當以行述爲主然其犖犖大者則已見於此矣公官道尹五年舉劾案章不失圭撮

疲曳演說盡瘁不辭固無負其職守然而余不復詳載者以爲承流宣化與公教育鹽政事業獨出裁制者異也銘曰儒學失傳憇不曉事世議益淆以儒爲戲不學者才學乃成罪稱以書生如撻諸市於唯河東理學有自惜哉末流徒長其伎口耳之間積寸僅四其與幾何影衮不媿公學貫綜公才果毅畢世幸勤力祛浮僞豈石雷之能穿忽戶樞之蠢敝將斯民之無祿抑日中之見沫喜才子之崢嶸知後來之有繼戢彌天於一棺付機封於永閉嗚呼嘻嘻我爲之銘訊千萬世

郝鈺如女士傳

前人

女士名蕙芬鈺如其字亦字左蘇又自號求靜子前蒲縣宰高平郝星濤之長女適雁門道道尹許海瀾長公子衣如今充督軍公署祕書少年中負遠志有儒稱者也星濤故清兩廣總督恭恪公墳曾孫娶厯城孫氏又山左巨族光緒戊戌生女士於汴梁先一夕孫夫人夢蕙生於庭寤而生女曰是其徵耶名之曰蕙芬五歲能識字指畫偏旁無誤者間屬對多雋語稍長讀四書毛詩過目不遺一字郝氏世家多書縱其披覽遂精於史每竟一代能挈其綱

領爲弟妹稱說之又摘其事蹟犖犖大者或名卿才大夫  
昭灼世人耳目間者以已意述爲短篇論說往往心思獨  
到雖老於閱歷者不能刊剗一字星濤出宰褒城幕中賓  
友多好文暇日爲近地之遊以詩歌相醺唱女士問其所  
從登降撰連城山遊記山水之奇文遊之樂若目睹焉過  
客尋惠髯讀之以爲絕倫也清命旣訖星濤棄官歸道梗  
不得達流寓臨晉自念五世食祿雖革命之際事與古異  
然出處不可以苟也於是卜居耽子村泥水自蔽一切破  
崖岸爲之時孫夫人久卒女士佐繼母劉夫人操持家政

茹齋飲水略無難色設女帳於家親授弟妹讀遠近女士  
多來請業者星濤顧而安之曰不圖天倫之樂乃得之家  
道坎坷時也然而吾女勞矣民國四年女士年十八來歸  
許氏衣如才旣相匹觀禮者以爲佳耦夙興纒笄宵衣以  
見翁姑海瀾公命爲新婚詩卽擬進八首命撰家書一通  
握管立就輕重懇款皆得宜顧左右曰名不虛有也呼衣  
如誠之曰得婦如此若可悠悠耶衣如肄業鄉校女士旬  
月必有書候起居書輒數千言商量學業或及時事於物  
理人情無不究而言不及私衣如恆出以示人觀者動色

起敬衣如前夫人姚氏亦以賢慧稱值其忌辰意閔默不自得女士爲文以奠設祭甚虔又欲哭諸其墓衣如止之不果乃爲詩弔焉而哭之於庭其嫻於禮而隆於情如此海瀾公起爲雁門道道尹女士侍姑之大同衣如入北京大學夫婦間所以相督勉者益大且遠女士持論以爲救國莫急於學而學必期於有用用之效不效則於家庭覘之大同地界朔邊其婦人不事女紅揄長袂躡利屐以飲食遊觀相尙於禮教未數數也女士請於翁姑創女子進德會自任會長所以匡拂誘導者備至久之風聲遠播北



士推爲女君而女士竟以積勞卒矣病中與父星濤公書  
略曰近年讀書實驗覺人生惟擴充天真爲可樂一經矯  
揉造作便覺舉步荆棘女之處人恆以澄潔之童心相見  
活活潑潑純任自然不欲以俗論縛也又曰若得讀書有  
成內而家庭外而社會盡一已之心力造就幾個好人材  
好兒童則雖不能椎結操作亦無愧矣又曰北京女子高  
等師範北人寥寥譬之一尺線江蘇人已占九寸吾晉乃  
零度已下女決意一行以振斯恥所慮者資格限人耳又  
爲長歌寄衣如寫其志聞者莫不悲焉女士以民國九年

臨晉縣志 卷之三  
五月七日卒夏歷三月十九日也年二十三適許氏者僅  
五年賦其篋得詩文數百篇而日記多至數十册衣如將  
爲料檢付刊而先述其言行萬餘言星濤亦有文抒哀因  
刪次大凡以爲之傳

郭象升曰女士之適許氏也既說纓燭出親黨環戶外聽  
所言女士首叩所天曰蟄居山中不知外事聞歐戰方殷  
害不及中國耶聽者粲然笑以爲聞所未聞昔馬南郡女  
適袁隗新婚之夕與其夫以言相支柱雖雋永傷於輕薄  
矣而范蔚宗載之列女以爲美談然則女士之志視是遠

矣余草女士傳凡再削稿卒用毛西河誌小商夫人例辭  
煩不殺使來者有考焉嗚呼志與天侔者不祥丈夫且然  
况其在女子耶斯才也斯德也而又有斯遇也其天死也  
宜哉

王調宸墓表

江蘇泰興 蔡寶廉

君諱殿元字調宸一字梅羹世爲臨晉人大父臨端父修  
儀累葉經商潛德弗曜君生而穎異髫齡受書記誦如流  
十歲遭父喪哀毀若成人年十六補博士弟子員旋食餼  
選光緒丁酉萃科卽於是年秋領鄉薦公車屢上未遂獲

售學校創興科舉停輟君爲顯揚計考職以知縣用需次  
河南歷充撫署文案法制局股員等差能文工書爲當道  
所識拔視風塵俗吏之所爲實有上下床之別中丁母艱  
神志消沮愴懷明發素願未酬服闋後仍回豫省河陽潘  
岳正待栽花猝遇世變趣還鄉里種秫之田尙少於元亮  
未了之累有甚於向平且家人生產之事又非所習君子  
固窮勢難坐食遂出膺河東女師範學校校長洎民國七  
年夏來遊并垣趙次隴旅長鄉同研席聲氣相投延充本  
部書記官兼充大學校師範學校國民師範學校國文教

習予每暇時過從見君伏几沈思塗乙課卷句斟字酌一筆不苟輒謂君體羸弱兼嬰宿恙似此耗殫心血庸有倖乎君則欬歔欬悒謂欲不如何可得乎方今天下之大患不在水火盜賊而在士大夫之競權攘利以自便其私圖吾輩漸漬於詩書之澤既不屑閹媚以趨時好則惟有鬱鬱居此以俟乎時之自至焉已耳不謂君竟賚志以終矣悲夫君生於清同治十一年正月二十一日卒於民國十二年一月十八日卽夏歷十二月初二日春秋五十有一元配夫人陳氏先君卒子一級蕙女二君性情竺厚志

臨晉縣志卷十五終  
識遠大先是君父故後君叔筦家政主析產君讓肥取瘠  
一無所校又恐母有難色則多方寬譬以卽乎心之所安  
嗣君叔暨叔母相繼歿謝遺子尙幼君挈之合居教養周  
至俟能自立歸還其遺產如初鄉人並以是多之其可風  
也已君歿後逾月紉蕙奉君之柩與夫人合葬於本村東  
北先塋之側以寶廉與君有昆仲之誼持狀乞表墓之文  
故略爲論次之系以銘曰命不副才官嗇於遇天定勝人  
儔喻其故急景俄催慨焉終古生寄死歸眠此抔土

臨晉縣志卷十五終

臨晉縣志卷十六

選三

詩選

過堯都而如聞擊壤適蒲阪而緬想賡歌蟋蟀山樞唐風  
宛在白雲汾雁逸興遄飛而况臨晉大邑王官勝地讀一  
鳴之集油然發忠孝之思挹貽溪之風慨然有高尙之志  
自茲以降舊志無徵私家弗述流風餘韻闕寂數百年矣  
後之覽者怒焉傷之纂錄此篇殆亦廣陵散之遺意也夫  
編者曰王志藝文一門有文無詩艾志所錄金元明各

一首清九首原料如此何選之足云不圖今縣尹俞家  
驥巡縣勸學無意中於村塾得萬厯舊志三冊其它殘  
佚惟詩歌七十餘首獨全天未喪斯殆有鬼神呵護歟

乙丑人日

唐司空圖

自怪扶持七十身歸來又見故鄉春今朝人日逢人喜不  
料偷生作老人

歸王官谷次年

前人

亂世燒殘滿架書峯前猶自戀吾廬忘機漸喜逢人少覽  
鏡空憐待鶴疎孤嶼池痕春漲滿小欄花韻午晴初酣歌



自適逃名久不必門多長者車

五老峯

宋 王禹偁

矗矗拂星榆崢嶸與衆殊精靈犇昴宿神異戴河圖捧日  
光先及參天禮不趨綠蘿供組綬清籟獻笙竽淺雨遙霑  
華○嵐下照蒲僧窗分未足郡閣占應俱漠漠雲交袂霏  
霏雪映鬚巨靈羞未壯玉女願爲奴磊落工難畫參差德  
不孤兒孫溪石小几杖澗冰枯洞鄙三茅隱山嫌四皓逋  
分形皆自立倒影要誰扶將數慚同漢臣名合贊虞嵩峯  
眞樹黨天柱大無徒安得隨人意移將近帝都吾君處四

面萬歲一齊呼

中條山

前人

崛起臣流邊奔騰欲上天遠臨滄海盡高與太行連大塊  
橫爲脊他山立似拳土膏經舜耒石險任秦鞭洞黑狂吹  
雨峯青冷罩煙店荒壇○絕寺古柏梯懸崦漏微茫雪崑  
垂淅瀝泉迸根通砥柱斜徑入間田北笑恆藏寶西輕華  
聳蓮三門遙托迹五老迥差肩落實樵夫拾靈根本艸傳  
柱空擎鴈塔倒影蓋漁船繪畫終無手封崇必有年鹽池  
浮翠靄蓮澤媚漪漣陰壑乖龍蟄枯杉凍虺穿圖經標數

郡神異產羣賢呼壽嵩何諂升中岱豈專斯文如已矣此  
地可終焉暫看猶銷病頻登合得僊許昌休自負吾什亦  
銘鐫

遊休休亭

鄭集

世事心知不可爲拂衣歸此養天機先生獨善端無意肯  
續春秋辨是非

休休亭

樂沆

貽溪澄澈玉峯寒居士當年此考盤訪得遺基青華下搆  
成危棟白雲端人間日月雙輪轉世外襟懷九鼎安醉魄

吟魂如未泯也應謝我數盤桓

司空侍郎故居

江休復

首陽采薇士商代緬以遐唐世有夫子遯世肥且嘉拔跡  
離汙險抗志凌青霞剝運扇頽風奸雄斥回邪不然隨流  
波橫噬楔猱牙吁哉土德衰睽乖鬼盈車英英夫子賢顯  
晦吾所嗟想見棲隱情遺文搴菁華山藏白駒谷水遷騷  
人家躑躅碧峯前寒日忽已斜

遊王官谷

二首

金周昂

潛溪時照塵埃客微雨不遮天柱峯斜日落花人去盡淡

煙樓閣數聲鐘

一峯凝碧倚晴空一水縈紆一徑通中有幽人曾說古誰知高興與今同

阻雪華下

麻革

愛山久成癖得山真雋永大華隔風塵五年夢幽境傳聞十丈蓮擬扣玉僊井雪花忽迷漫蒼巔墜昏暝蹇予世緣深方外久自屏意是希夷君俗駕疎造請行行風撼林稍稍雲度嶺雲間三峯面隱約露芒穎初如灑瀨堆屹起勢奔猛斬如倚天劍萬仞鐵光冷煙霞半明滅瞬息變光景

乃知造化心相哀亦相警  
絲鞭脫忽忽回首心耿耿  
浩歌夜深寒孤月挂峯頂

登臨晉西原廢寺

陳賡

前朝廢寺枕山阿尚有摩雲窳塔坡  
故國已非唐日月老僧猶指晉山河  
年來筋力登臨倦亂後心情感慨多  
石蘚荒碑碎文字他年更得幾摩挲

王官飛湍

元王惲

石竇懸流雪練飛夜深和月映松扉  
恨予不遇貽溪老一笑山間說化機

臨晉道中

前人

野雪晴消滿道泥  
茫茫銀海際煙霏  
日斜信馬中條北  
愛煞山光照客衣

虞鄉道中

前人

中條如畫色蒼蒼  
過雨晴嵐帶夕光  
望入王官饒水竹  
路經虞坂足耕桑  
未容巖桂相招隱  
自歎微官有底忙  
多謝曉風驅暑退  
笠簷吹作馬頭涼

臨晉道中

王思誠

條山河水壯封疆  
城外峨原百里長  
蒲坂東來通猗頓  
桑

陽春集卷之六 年一六  
泉南下接虞鄉唐家舊德推裴寂漢世元勳憶霍光故國  
流風令尚在穹碑高塚映殘陽

又

前人

崑原回首望汾陰寶鼎金銷瑞氣沈千古帝王行幸地草  
荒輦路暮雲深

題休休亭

明薛瑄

中條山下王官谷草木煙霞景物幽僊子固知時霏霏野  
亭從此號休休坐中爽氣長飄灑天際浮雲任去留墮笏  
已超塵網外高名千古鎮攸攸



條山東頭

前人

魏國中條此盡頭登臨暇日興悠悠兩岸勢轉黃流靜萬壑聲寒碧樹秋官舍飛臺臨遠谷琳宮細路遶層邱風光滿目皆吾土逸氣飄然總勝遊

王官谷

呂柟

硝池晚過愛漁舟何似濯纓亭上留夢裏遊春懷老杜雲邊攜友得新邱孤燈天柱峯前酒落葉王官谷口秋此意相將更不盡黃河南望日東流

同初內濱程條山聯句

前人

看堰東迴衣振塵濱內王官攜酒上嶙峋山條碧流雙繞貽溪

遠野溼古柏交加石硯新濱內入夜論文燈屢剔山條訪山觀化

日相因野溼百年勝會應難得濱內金谷桃園此更真山條

觀天柱峯  
前人

天然一柱聳嵯峨山條快觀如從雲漢過野溼返照着巖渾翠

色濱內鳴泉繞麓薄笙歌山條平支四極堅鰲足野溼獨立三冬

插泰阿濱內表聖當年曾樂隱山條高峯千古亦同科野溼

聚仙堂夜飲  
前人

僊堂誰搆此處逢野溼促席清談引漏鐘濱內澗底水聲喧夜

靜

山條

洞中神侶得今從

野涇

詩標有景君先奪

濱內

酒盞無心

我獨濃

山條

好是濯纓亭上月

野涇

解人來往共從容

濱內

### 聚僊堂

前人

攜友登天柱河山分處眞手今摩白日足已躡青雲萬里  
風花細一川秋柿新王官谷口上莫易告他人

### 王官谷樂隱

許莊

杖藜徐步看青山笑向東風解醉顏幽徑有花春正好柴  
門無客晝常閒辟開荒地二三畝結上茅廬一兩間睡到  
日高猶未起臥聽流水任潺湲

王官谷春日

前人

舉世春光盡眼前此中春意獨堪憐  
草痕綠遍花間地山色蒼連閣外天  
青鳥積年陪瀑布丹崖千古瀉懸泉  
何時借得開山柄劈破鴻濛萬里煙

咏臨晉

陳价

峨嵋故坂臨花縣涑水新河帶野田  
百折塵途紆使節諸屯村舍起炊煙  
虞廷禮樂皇風迥晉國兵戈霸業偏  
此日中原涵帝澤願將休養重旬宣

過臨晉

喻時

迢遙候吏不聞喧倚劍何能答帝恩  
霜下空原凋木葉風迴孤塚送禽言  
飛沙不見蘼蕪嶺勒馬時過荆棘村  
忽憶晉文空霸業桑泉寂寞自啼猿

咏涑水滌迴

李章

郭外觀風發浩歌清風兩岸景融和  
文生水面千層浪秀發源頭九曲河  
滾滾盤旋民物阜洋洋化育俊才多  
天真活潑無窮趣何事臨川歎碧波

王官谷雨後

張舜臣

細雨清沙淨不塵河山厯厯檻邊新  
雲開絕壁天常近樹

滿平田煙更勻岸磧回窺泉底玉石牀高臥洞中春幾回  
夢坐司空語獨自千年樂隱淪

謁司空表聖

王顯忠

誰遣司空到此山祇緣道大渺難攀任教金殿傳三詔且  
自清心愛一閑無物可移泉石興有懷識破利名關先生  
不是忘斯世羞共隨行逐隊班

戊寅中秋同諸友泛五姓湖夜宿延祚寺

王崇古

芳湖尙憶昔年遊水色山光接素秋歸去幸逢金石友重

來同泛木蘭舟白蓮一望能超悟綠酒頻斟頓解憂禪榻  
高懸消永夜清風明月共悠悠

姚暹渠

曾大有

晉秦分野羣山圍川珍岳貢承平久皇仁敷化理薰絃民  
物熙熙自康阜作鹹潤下箸箕疇雪甸瓊花顆如斗泔泔  
鹹利佐邊儲水患年來數非偶猥子謏陋媿三監胸中鹽  
鐵書何有旁詢故道決西流父老前陳已騰口我家沉竈  
忍囚蛙東里漂盧總龍湫吁嗟誰辦拯溺功千載神功惟  
夏后一勞永逸茲所圖詎當鄰壑愚黔首乃計徒庸程土

物飛檄官胥迅奔走萬杵秋煙廢塹完弱縷沿堤裊新柳  
導滯疏煙涯大湖礮礮胡能當繫楛清流泊岸瀉黃河濺  
沫驚濤鐵牛吼桑泉土藝麥有秋婦子欣欣饁南畝會看  
漘海凝素英依依斥鹵歸窮蔀司農外府歲計餘裕國通  
商謠白叟作法于貪末弊流區區桑孔誰其咎何朝權政  
平如澤祖宗立法原仁厚隨時補弊在臣工戒事先期豈  
容後將來繼者富奇策經略顛看掩千醜潤澤功歸畫一  
中億萬斯年同不朽

五老峯同王似鶴荆觀四分韻

原註峯在臨晉  
西南接中條山



閣爾梅

沛縣人

奇峯遙望紫氤氳  
巉路登來曲磎分  
河渚星精飛帝座  
髦頭筆勢寫天文  
單椒領袖芙蓉隊  
一笏趨踰玉帛羣  
秀澤生成難比似  
匡廬五老不如君

羣峯圍作一峯垣  
卓立中宮擬至尊  
看似浮圖非九級  
疑爲砥柱失三門  
煙巒列侍皆成象  
鞦索懸空不見根  
絕壁千尋無路上  
却從過後怖心魂

右二首見古古山人

即爾梅

山西集

司空表聖祠

二首

朱瑄

陶晉書卷之六  
黃塵烏帽走西州  
溽暑秋霖雨滯留  
居士有靈應見笑  
微官何事不休休

雲表高亭面面風  
闌邊列樹障秋空  
憑君爲我開穠綠  
盡放南山入眼中

五老歌

楊博

曉披五老峯上雲  
晚釣五姓湖中鯉  
忽逢漁父三五人  
問是五姓誰家子  
自云無姓亦無名  
接輩相傳常釣此  
月落天昏駕小舟  
從來未見風波起  
得魚心自安無魚心亦喜  
公昔提兵在薊門  
單于繫頸呼韓死  
頗聞飛語轉流傳  
彤

弓幾付東流水東流水真可笑何如相將日垂釣白雲冉  
冉生玄鶴雙雙叫極地與窮天居然不盡其中妙

遊王官谷

馬錄

雅聞王官名未遂王官賞今日便道來乃慰飢渴想千峯  
紫翠何崔嵬白日照耀芙蓉開懸崖嘈嘈瀉瀑布天吹玉  
雪天門來躋層樓翹白首縹緲蓬壺在戶牖把酒欲揮毫  
愧非陶謝手日暮憑高空浩歌王官王官奈爾何

烈婦詩

婦鹽運分司汪公女呂主政子諸生  
嘉穎室以歸寧留父署聞夫計自盡

清姚緝熙

名花常並蒂好鳥亦雙翔萬物各有託人事足參商憶昔  
歸寧日爲妾理行裝暫別莫悽愴偕老天長君忽隕其  
生妾復何所望持刀急自剄血湧命不傷旁人互勸說謂  
宜稱未亡嗣孤倘成立姓氏且流芳妾身自有志妾志無  
更張聊復緩斯須赴義忌匆忙昏定晨復省依依父母旁  
含悲與誰語淚下暗霑裳啓篋見鉛粉此物一何良潔白  
流肺腑矢死得奇方是夕鬼神泣風淒月無光香魂覓所  
天泉路杳茫茫

五姓漁舟

王恭先

湖光瀲灩古城西名號張揚舊有題滄海桑田幾清淺綠  
蒲紅蓼自高低急橈舴舺常飛雨帶藻荇簞簞不着泥款乃  
一聲人不見夕陽澤畔草萋萋

古城落雁

前人

自是蒼茫雲水鄉呼羣引侶且相羊不因愛力輸蘆葦祇  
爲謀生惜稻粱沙岸數行雜鷗鷺煙波十里卽瀟湘年來  
自笑摧頹甚南北追隨有底忙

涑水橫橋

前人

三月桃花涑水平綠楊堤外一橋橫玉欄晝鎖龜鼉睡金

鏡夜開蟾兔明不見車書通萬里也看來往老浮生如今  
莫問題詩手石柱年來半已傾

蛾眉春雨

前人

坡陀長坂帶橫阡雨氣春來破曉煙幻出雙蛾遠山影真  
成百頃滿篝田露深桑柘千村暗風過牛羊一笛偏用意  
天公誰領會杏花榆莢又當年

星臺朗月

賈修明

峨嵋頂上豎高臺皓月當頭勝景開萬頃琉璃鋪下界一  
天星斗絕纖埃白雲有影隨風盡烏鵲無聲繞樹來十二

瓊樓知否在振衣還擬到蓬萊

雲樓曉鐘

前人

何處鐘鳴欲曙天文昌閣上有宮懸一聲響徹雲霄裏五  
夜魂驚枕席邊巨製工傳鳧氏手元音鑄自政和年間雞  
起舞芳踪在休讓祖生先著鞭

雙嶷對峙

前人

重重疊疊起岡巒大小嶷山入畫看左右橫陳似華表東  
西互峙恍仙壇峯頭祠宇干雲矗坂底桑麻布野寬最是  
春來初睡起雙環對影態多般

五渡同流

前人

禹門東下水奔流行過潘西五渡頭雲樹兩岸嘶繫馬煙  
波千里送歸舟乘槎客有探源志擊楫人無駭浪愁蒲坂  
鐵牛今在否還當乘興一登樓

題小照

荆炳

水石闢幽居高士耽清靜中有數枝梅間弄空明影

秋夜

前人

塔院寂無人月影侵書幌時有一僧歸落葉階前響

戊寅秋接辦賑務和荊生

聚奎

贈詩原韻二首



知縣 艾紹濂

河東災害至撫恤賴疆臣同是宣君德誰居濟衆仁十千  
安取歲三百擬開困星使月卿會奇謀偉略新設方籌露  
積挽粟俾雲屯將伯予呼助鄰邦誼篤姻漕輸江廣浙糴  
向豫齊秦所喜平蒲境猶然堯舜民守貧多本分畏法不  
辜恩檄我洪崖令移治北解人慈衷雖在抱束手愧難伸  
挹注倉箱實遷延富貴春賑分農與士界化洧和溱澤自  
霑霖雨圍同解蔡陳一犁瞻馬首二麥漾龍鱗漸晉承平  
象天心厭悔眞

大難憑誰靖端推宰輔臣緩蠲舒物力賑貸布皇仁有室  
皆懸磬無禾漫取困頻年饑且饉荒政舊翻新責豈容旁  
貸膏難忍暫屯恤災同捍患睦族並聯嫺昔本秦輸晉今  
仍晉仰秦疆圖雖異域盛世不殊民燕趙通鄰好南東沛  
普恩藉他飛挽力活我子遺人敢謂難中易都緣屈後伸  
此時欣轉泰大地共回春舟泛來雍絳輿嗤濟洧溱務勤  
宜法古乃積許推陳時雨欣滋麥游魚喜躍鱗羣生叨再  
造覆載天地眞

登臨晉城樓

馮俊卿

高臺突兀夕陽邊此日登臨眼界寬  
曲折黃河環晉地峽  
嶢太華壓秦川鳥飛天外形如畫  
人到樓頭意欲仙回首  
鄉關何處是暮煙十丈落風前

天柱峯

吉長清

空谷良非遠招攜亦自豪轉忌千徑曲  
陡見一峯高峻欲  
卑三詔尊將俯六鼇重巖眞可仰一爲薦溪毛

丹陽觀

前人

寂寞丹陽觀崔嵬天柱峯已無雲際鶴  
猶見水中龍仙蛻  
藏珠塔靈風拂磻松三生如可證同聽一樓鐘

拜司空遺像

前人

緬邈先型遠，皈依舊德尊。  
凍禽窺石閣，野鶴到柴門。  
赤鳥風何古，黃綾詔尙存。  
後凋見松柏，千載着靈根。

次虞鄉

杜夢徵

洗馬村南路，王官紫翠重。  
人家依谷口，樵徑入高峯。  
竹暗千竿雨，泉飛萬壑風。  
司空亭榭在，緬仰思無窮。

王官谷訪友

杜若洲

曉日上王官，林煙一帶寒。  
司空遺舊谷，之子樂棲盤。  
飛瀑冰千仞，脩篁雨萬竿。  
浮生亦何爲，只說住山難。

夜行

賈克勤

杳杳途無際行行夜未休  
風來山自響人靜月仍流  
寒氣催鴻雁勞生歎馬牛  
王官明日近一解旅人愁

登飛閣

賈業修

飛閣憑虛構高標氣象雄  
登臨蕩魂魄嘯吸撼蒼穹  
山色通仙路河聲捲烈風  
何人叫虞舜蒲坂暮雲中

五老峯

前人

五姓湖前五老峯幾峯矍鑠幾龍鍾  
地臨東井星精聚雲窳西岑筆興濃  
豈是弟兄開蜀道不隨草木受秦封  
到來

便覺廬山近欲繪真形問秩宗

述懷

祁蕙芬

許振  
室

明月當窗人已寂欲眠不眠且徘徊徘徊四顧感身世陳  
編讀爛何有哉曾聞姒氏之徽德南國風化王佐才又聞  
桓孟之清高千古史册名如雷我生意氣在青雲此身未  
肯逐塵埃大好光陰等閒擲百事無成壯志摧轉念人事  
亦何常精誠所至天能回聖賢雖遠可力致正心誠意萬  
象該失之毫釐謬千里回頭是岸煙霧開勉乎勉乎勿自  
餒前途遠大莫疑猜

許子中宮贊陝西涇陽人以詩書畫名於時清咸同  
間掌教桑泉書院造就人才甚衆歿後眷屬流寓邑  
之西代村因數經兵燹遺箸散佚殆盡修志議起屢  
走訪其曾孫武繩搜求遺墨竟不可得癸亥春初志  
乘脫稿無意中於李紳蔭坊座中得觀宮贊詩畫冊  
驚喜交集又曲沃名宿仇君建侯爲余二十年前共  
筆硯者文章道德邁冠當時辛亥以來閉門課孫不  
問世事今已七十矣忽杖策來遊盤桓兩月所作感  
懷詩頗夥之二君者雖時代先後不同其爲厲賢則

一茲併撮其所作載之邑乘以誌鴻雪因緣而存吉

光片羽云

紹興俞家驥識

孝先為余言傅青主徵君畫木瓜如此謬擬其意

桑泉書院山長許 岢

霸主勤王室風人寄所思名傳千古意祇是一篇詩頗憶

公佗老能留翰墨姿爭雄吾豈敢永好示心期

題自畫鯉魚

時避地西張感而作此

前人

蒲州五六月積水濫河濱驟落三篙漲時漂尺半鱗磨將

刀似雪斫取膾如銀信美那能食傷心何苑人



題管仲姬畫蘭

前人

賸雨零煙玉滿林  
鷗波亭畔幾沈吟  
霜毫洗盡燕支色  
風骨猶應勝藁砧

題自畫蘭竹

前人

別墅圍碁老謝安  
階前小草盡芝蘭  
淮淝一戰成奇捷  
合作千章大木看

題自畫墨蘭

二首

前人

沿堦分植蕙蘭叢  
十二湘簾面面風  
風未定時簾未卷  
便呼荀令坐當中

東風吹水水生波岸芷汀蘭送擢歌拾得芳香贈離別江  
淹文藻奈愁何

登臨晉城樓有感 二首

仇汝功

風漾炊煙萬縷斜城頭隱隱動清笳羽翔倦鳥爭歸樹日  
極飛鴻不見家一線黃流迷遠渡半輪紅日擁晴霞客中  
易起登樓感王粲于今鬢已華

平疇一望告秋成刈麥人歸笑語聲民樂漁湯呈異瑞

鄰縣

多無稱中稔邑

田荒沃土誤催耕

宿故鄉去秋無雨

最愁往事

說丁戊

光緒丁丑大旱

又見同音呼癸庚

夏秋之

却怪間雲難

出岫不爲霖雨潤蒼生

喜臨晉縣志告成

前 人

絕筆誰重續遷流四十年新風今梓里舊地古桑泉信史

存文獻清囊捐俸錢下車勤要政不負使君賢

俞下涵青縣

力般般以修志爲事許海瀾道尹獨  
捐貲千金以成其事時應美之

簡質愁無色精華易費辭

前志或尙詞華或涉簡  
易惟今書獨得其宜

語難游

夏贊書見馬班遺異世留明鑒窮巖考斷碑董狐操妙筆

三載獨淹遲

以吾鄉志係革實峯孝廉纂修鄙人副之  
與原訂體例稍有出入至今關筆

臨晉縣志卷十六終

臨晉縣志附錄

縣志舊序一

余戊戌夏受命宰是邑公餘卽詢縣志閱之迺知縣志廢之久矣余喟然嘆曰爲政有觀法志者守土之藉資觀法繫焉不然是渡河而忘舟楫鑒貌而乏朗照也自昔號才智之士未嘗不按陳蹟遵往誥以成治理矧實余之鹿昧也分訓周君迺顛末其事嘉靖間黃輿失靜原板湮沒茂才楊生偉好古掇拾所遺稍稍成編視篆王君諱時昇者取而鈐諸梓第體裁未正考核未精勸懲未備不可以訓

余欲訂正之以災祲頻仍日爲逋拖計而未遑時向乾荆  
公在衰絰中不可以請迨竣命行人事旋里余以此請公  
慨然任之至癸卯歲始脫藁焉誠重之也其文雅其事核  
其勸懲嚴備顯微闡幽範今垂後允爲不朽之典足以傳  
矣噫志非徒備觀覽鑒省爲重總之官與民而已民事修  
則官箴懋官職墮則民事窳惟居官者不以刑罰先德化  
不以智術勝眞誠因性以牖民因時以舉事期不失唐虞  
三代之遺意焉可也若以德化爲迂何山川不改而下民  
恆性可改乎又何儉約樸茂之風至今存也余不敏遂撫

前人所未備之實冒然寓激勸之義卽有以杞人臯我者  
余在所不辭矣萬厯癸卯孟秋邑令銀麟高惟岡書

縣志舊序二

臨晉一邑爾自唐虞夏皆綴旒近畿而考禹貢職方在冀  
州雷首之北當時黎元被服三聖人德化何醇釀也至成  
周封叔虞爲晉國則邑固晉地春秋時秦晉交爭實以威  
力雄長晉勝則同華等城胥屬版圖而秦勝則入河曲俘  
王官築壘於此蓋幾號戎馬之郊關河之衝矣夫德力遞  
降山川不改獻善備敗有司具存矧自漢唐宋以來閱世

既久往蹟殊多可令磨滅無傳耶且志非小物也無徵不信聖喆所難遵憲宜民中材亦易昔紫陽夫子守南康甫下車卽詢訪郡乘說者謂其知治體亦以見先儒君子宰政臨人規範迥別非鯁鯁簿書期會者所敢望也余邑故有志嘉靖中經地震往牒湮切十之八九而一時父老所傳聞學士所稱說又訛信相半嗣是樂陵史公盭屋趙公咸屢修屢罷萬厯丁酉楊茂才曾一脫藁顧間有當紀者遺而不錄當備者略而不詳錄且詳矣或復曼衍舛錯而不可觀蓋上下千百載於一人之聰明若斯之艱也會戊



戊銀麟高公以名進士來莅縣事謂邑無完乘亟欲更定之而庶務方填越二歲庚子秋政通時和民安物阜乃造予托以纂輯之役余不敏竊惟志談何容易古之人江淹號博洽而獨稱修史莫難於志陳壽善叙述而所著獨於志略焉余尠聞寡識又胡敢蹈僭妄之譏特以公修廢舉墜雅追紫陽盛事而不欲重違其意遂參閱舊編蒐稽史傳遺者補之疎者詳之瑣言嵬說出於耳食者削之迄壬寅冬粗成前後二年許第猥以牛馬走東西南北頗不獲自適竄次未已復藏之故篋迄今展帙而視愧多謬遺意

殊弗慳也雖然業報竣矣敢齟齬標紙上言耶今神聖當  
陽和氣旁皇休風遐暢方欲上齊帝王之隆而二三循良  
官茲土者亦惟是酌古調今緣章飭治察休戚利病之原  
妙鼓舞變通之幾則必不以威力先德化而唐虞夏后氏  
之懿鑠再見其地也區區秦晉云乎哉余故忘謏陋敬體  
公殺青意而序之萬厯癸卯孟秋荆養喬書

縣志舊序三

志者外史之流也邑有志國有史蓋大小相資分合成書  
匪細故也而作之者難其人矣王元美謂文人之才在善

用虛史官之才在善用實虛者可以意創實者不得不因  
遷因談固因彪而家學罕承者則虞預之因王隱蕭嵩之  
因吳兢皆是也予謂元美自爲一部史料說法遷變編年  
之法爲紀傳固於紀傳之後又加褒貶至范蔚宗奮其才  
力盡變班馬之例嘗自謂論贊奇變不窮殆無一字虛設  
比方班氏非但不愧之而已然則因事創義史家之法志  
亦宜然臨晉舊志遠不可稽明萬厯癸卯邑令高公與鄉  
先達荆公鍾陽重修之垂今八十餘年滄桑更變事故日  
增失今不理後將無徵矣歲甲子應城齊侯至雅意興廢

築城浚隍之餘詢及縣志授余特簡予惟蘇子瞻一代人  
豪乃不敢修三國志予何人斯乃敢爲縣志然前事者後  
事之師已往者將來之鑒踵其事而增華變其本而加厲  
蓋用因用實予固竊取之矣顧因亦豈易言也疆域山川  
風俗典制田賦戶口往牒具在新規攸存然且蒐放失羅  
舊聞升蛾眉之高原眺中條之絕頂殘碑斷碣遇景卽留  
牧豎樵夫逢人便問亦旣察往以知來信今而傳後矣惟  
是人物列傳評緣於月旦論定於蓋棺其人或已百年或  
數十年或仕入名宦或邑祀鄉賢亦有一片墓石出自昌

黎之手數行封事未效羊公之焚前因已定後嗣難更然  
後知子瞻力辭荆公之託者非不能爲三國志也有五代  
史以爲之鑒也雖然史者善善而惡惡志者紀美不紀惡  
歐陽公不立韓通傳識者以見作史之難予於列傳之紀  
美也蓋自爲志之體宜然而非有私曲於其間矣是役也  
始事於康熙甲子之五月訖事於乙丑之九月其間運逢  
兩秋藁經再易然而掛漏尙多紕繆不少續而正之以俟  
後之君子康熙丙寅孟夏王恭先書

縣志舊序四

甚矣予之無似也奔走於令者十五年潦水無根之學涸  
已久矣奚能志哉自調任桑泉地衝而繁且瘠時軍需旁  
午置頓之瘁驛謁之馳雜以簿書獄訟之紛沓胸臆間吁  
駭震動不能自己又奚暇志哉夫不能志不暇志而強爲  
之則苟已甚則謬已妄庸巨子舍我其誰然間嘗考臨之  
志創於邑令張舜臣蓋在嘉靖二十二年也高惟崗繼脩  
於萬厯時隔六十載矣越七十載爲國朝康熙丙寅歲齊  
以治乃有事於此迄今近百年地理之沿革人物之變遷  
賦役之改易禮儀風俗之流傳其可考而知者已什遺四

五及今不爲後之人將何從藉手壬辰春馮子文止來視  
予予將畀以是任起而辭曰止嘗有事於壺關志今猶歎  
然此非率意可舉請吾師待之越歲陽城李子誥來予復  
以是商李子亦有難色蓋二子皆學有得力謙以自牧者  
也每當公事稍閒與李生縱談經史大義自夕達旦雖互  
有啓發究亦空言無補乃翻然曰我輩何不以筆易舌乎  
今雖倥傯鞅掌然有隙亦可藉以自娛消此中苦滯也李  
子曰筆削惟吾師任之誥事搜討而已予聞而愧且恐不  
敢遽爲也時復躍如似有鬼神迫之者於是取往志究其

原委令邑諸生採訪近時之人與事以畀予忽漫成篇不計工拙或尋思夢中或構意馬上或行行肩輿挾冊而稽或擾擾郵亭橐筆而載稿未就有荆生麟兆不介而造謂今軍務方勞吾師當恤民興事何汲汲於此如必不獲已則當延世之有文學者爲之吾師自加評騭亦省力過半矣予曰子言是也然古人先行其言予知不逮將以所言策吾行自爲之乃親切而有得也志星野災祥可以知人事之脩悖志山川疆域可以知鄉邑之盛衰志賦役丁徭可以知民生之休戚其他紀人紀事無不可爲身心之助



政治之資焉不然予奚能志哉又奚暇志哉志將成杜生  
昌炎適至曰吾師之志以時事貫經史足矯俗矣然其過  
信古人不能諧俗者請易之可乎予喜曰子若斯是吾師  
矣吾何敢師子因留連信宿時而朗誦時而微吟時而相  
校若讎時而相合若節一義之暫如太璞初開一筆之勾  
如亂絲立斬每興酣意得杜生輒飲苦茗十巨碗見者以  
爲怪人而予與李生皆相見恨晚猶恨馮子文止不得與  
於斯樂也爰付諸梓以俟他日之筆削者杜生去予若失  
李生亦若失既而李生曰杜生與吾師之所樂者文也吾

師曾記語荆生之說乎予曰豈敢忘哉敬諾乾隆三十八年歲次癸巳仲冬月邑令王正茂書

縣志舊序五

志之爲書或數十年一修則耳目尙可及傳聞亦有據乃往往遲之又久未能隨時續修者非盡關乎時數也特無以振興之耳余於戊寅秋調任斯邑下車後亟索邑乘而年久失修竟無成書嗣於市肆中得有舊部考志之修在乾隆癸巳迄今百餘年矣戶口之增減人物之變遷徭役之更改選舉之代興以及嘉言懿行貞婦烈女所宜隨時

修纂者不知凡幾今幸轉歉爲豐昇平有象又欣我曾爵  
撫憲仁民愛物爲三晉福星於善後事宜極力籌辦志書  
一節尤殷殷焉光緒五年三月初九日會同閩部堂奏請  
纂修通志各州縣志亦一律修輯奉旨允准飭知到縣適  
姚沈溪比部告假在籍殫見洽聞爲士林所仰望因請總  
司其事並邀五鄉紳衿分路採訪於節孝外有能人所難  
能者一律收入以資採擇而又慮經費無所出也幸各紳  
富慷慨樂輸共集若干金設局招匠三閱月而告成說者  
曰志之續修自乾隆三十八年起其間年穀順成人物奮

興勝於今日百倍者何可勝數而志之書不成於康平之日而成於凋敝之秋其故何歟余喜而歎曰天下事有其舉之莫敢廢也設非上憲登高以呼卽大有屢豐未必不因循良久然則志之成其時數爲之耶抑有以振興之耳况我晉兩遭兵燹三載旱荒若非及時延搜後將無從措手且其中濟貧周急義行良多守志忍飢貞節不少不於此時登諸記載何以勵人心而厚風俗耶此次恪遵憲檄原志一仍其舊另續補志兩冊前志未載者列補遺一門其節孝無論年遠日近泐石通衢覆以碑樓以垂永久而

示激勸凡耳目所可及盡心力而爲之勿負我爵撫憲切  
切愛民之誠共仰答乎我皇上二百餘年之深仁厚澤焉  
是則余之厚幸也夫光緒庚辰三月中浣知縣事濟南艾  
紹濂謹識

### 縣志舊序六

古者行人所經凡疆域之夷險民俗之媿惡政治之得失  
必各輯一書獻諸朝廷以備顧問宋神宗時有常州守奉  
召至京問以錫山去郡遠近茫無以對神宗謂其人不足  
爲政朱子以名世大儒歷官所至常喜問其志書識者謂

其知治體志乘所關不綦重哉臨晉舊志自乾隆三十八年前大令王竹崖先生修輯迄今已百有七載天時人事迭更屢變從未有起而輯之者邑之人抱殘守缺悵然於修廢之無期冀上焉者有以作其先斯下焉者可以趨其事乃或諉於歲時之不易也或諉於秉筆之難其人也曰將有待也嗚乎年復一年久之又久茫茫墜緒漸就淪湮欲待後之人網羅蒐討編輯成帙不愈難乎戊寅秋鏡漪艾侯由洪洞調任來臨甫下車卽留心民事問縣志之有無購舊本而裝潢之以爲百餘年之記載尙缺如也非守

土者之責歟會凶荒甫脫經理善後事宜未遑暇及逾年  
政通時和百廢俱舉適大府擬修通志檄飭各州縣一律  
遵辦侯殆先得乎其心焉特以是役屬之濟欲令總司其  
成濟譴陋荒疎何敢當茲鉅任然亦未敢重違其意願居  
於贊襄之末如游夏之侍修春秋得與其事焉足矣爰集  
同人廣爲採訪或得諸耳聞或得諸目見分類兼收各具  
節略俟於簿書之餘詳加考核計其去取謂志與史不同  
志特史之一體耳毋文飾毋附會毋遺漏毋支冗檢查舊  
志殘者補之缺者續之乾隆三十八年以後之事蹟逐類

而新增之名曰續志與舊志合爲一部閱三月而蕝事繼  
自今沿波討源得所藉手不至致歎於杞宋之無徵是侯  
之嘉惠於吾邑者爲何如也然而侯之志不但此也侯之  
急急於纂述非徒侈文辭應故事也田賦戶口人才諸大  
端按籍而稽旣厯厯如繪其次節目必將舉而措之見  
諸實政矣然則侯之意卽紫陽夫子之意豈可與常州守  
同日而共語也哉庚辰三月中浣邑人姚東濟識

臨晉縣志附錄終



臨晉縣志刊誤表四

卷十三

頁 行 字 誤 正 頁 行 字 誤 正

十一 十六 二十 脫一字 十三 二 六 業 葉

卷十四

頁 行 字 誤 正

三 十 五 波 坡

卷十五

頁 行 字 誤 正 頁 行 字 誤 正

七 十六 十 弁 棄 九 三 一 廿 二 穎 隸

十二	八	十八	軍	君	十三	五	五	弈	奕
十三	十七	六	百	首	十八	十五	四	柔	溯
十九	七	二	欸	欸	卅五	十五	十	幸	辛

卷十六

頁	行	字	誤	正	頁	行	字	誤	正
三	十五	廿一	遷	逸	五	十一	三	令	今
五	十六	廿廿一	罪罪	靡靡	八	二	十一	縻	靡
十二	二	廿一	欸	欸	十五	五	十二	忌	忘
十五	六	十	巖	巖	十七	十四	十一	名	各

刊誤表四終

